

Ya Mangêd ya Habi tungkol kan Apo Jesu-Cristo ya inhulat ni Marcos

Paunan habi

Ya Mangêd ya Habi tungkol kan Apo Jesu-Cristo ya inhulat ni Marcos ay nag-umpisa hên êmên di, “Ya laman hên hata hulat, ay yabay ya Mangêd ya Habi tungkol kan Apo Jesu-Cristo, ya Anak ni Apo Namalyari.” An-ipahlêk êt bayri ya ubat kan Apo Namalyari ya kapangyarihan ni Apo Jesu-Cristo. Mahêlêk ya habayto ha pamanoro na, ha pamanambut na kanlan Satanas, haka ha pamatawad nan kasalanan lan ampaghêhê. Anhabîen na êt di ni Panginoon Jesus ya tungkol ha sarili na ya hiya, ya Taga-Langit, ya In-anak Tawo, ay atsi bayri ha luta, para idin nay lawini na, ta êmên iligtas ha ayn anggay parusa ya hilay ampaghêhê.

An-ipamwang ni Marcos ya kapangyarihan ni Apo Jesus ya mahêlêk ha kapapaêpapah ya dinyag na.

Ya katganan hên hata hulat (16:9-20) ay ayn ha kaatag ya hulat ya Griego. Kabay anhabîen lan kaatag ya alwan hi Marcos ya main hulat hên hata tawlin habi di ha 16:9-20.

Kabooan hên pinakalaman

Ya umpisa hên Mangêd ya Habi 1:1-13

Ya dinyag ni Apo Jesus ha probinsyan Galilea 1:14-9:50

Ya dinyag ni Apo Jesus ya umpisa ha Galilea angga ha Jerusalem 10:1-52

Ya tawlin parominggo hên biyay ni Apo Jesus 11:1-15:47

Hi Apo Jesus ay nabiyay oman 16:1-8

Ya pagpahlêk ni Apo Jesus hên hiya ay nabiyay oman, haka ya pamag-orong na ha langit 16:9-20

Ya panoro ni Juan Bautista
(Mateo 3:1-12; Lucas 3:1-18; Juan 1:19-28)

1 ¹ Ya laman hêñ hata hulat, ay yabay ya Mangêd ya Habi tungkol kan Apo Jesu-Cristo, ya Anak ni Apo Namalyari. ² Habaytsi ay nagumpisa hêñ nanupad hêñ hulat lan mâmipamwang hêñ an-ipaihip kanla^a ni Apo Namalyari, ya wanan Kahulatan,

“Iutoh ko ya mihay muna kamo, ya mangil-an hêñ danan mo.

³ Hiyay ampan-angaw ha legal ya kabalah-balahan, ya wana kanlan kal-atan ya naka-tsipon,

‘Il-an yoy nakêm yo ha pamanlumatêng hêñ Panginoon,

Ya nanad ha pamil-an hêñ dann ha pamanlumatêng hêñ mihay matag-ay ya manungkuluan.’ ”

⁴ Natupad ya habayto hêñ nakalatêng hi Juan Bautista hêñ namipamwang kanlan dinumani kana ha Ilog Jordan, ha legal ya kabalah-balahan, ya dapat lan paghêhêan hêñ talibatokan ya pamanyag kasalanan, bayo dapat pabawtismo hila, haka patawarên hila bayto ni Apo Namalyari. ⁵ Kal-atan lan taga-Jerusalem, haka kaatag pon ya legal ha probinsyan Judea, ay dinumani kan Juan. Inamin haka inhuko lay kasalanan la, bayo naghawawtismo hila kana ha Ilog Jordan.

⁶ Hi Juan ay nakatakop hêñ dyag ha habot hêñ kamelyo, haka ya tagkêh na ay dyag ha balat. Ya angkênaen na ay doron haka main bayron pulot panilan ya an-inêmén na. ⁷ Panay nan an-ipamwang ya êmén di, “Ya lumatêng ya Mesias, ya Cristo, ya impangakon Mámilitgas ya pinili ni Apo Namalyari hêñ mamaala, ay makapangyarihan kangko. Agyan mangokal hêñ hêél pag-apin bitsih na, ay ayn akon karapatan ta matag-ay ya tungkuluan na. ⁸ Hikoy ampamawtismo kamoyu ha lanêm, noa, hiyay mamawtismo kamoyu ha Espiritu ni Apo Namalyari.”

Ya pamawtismo kan Apo Jesus
(Mateo 3:13-17; Lucas 3:21-22)

⁹ Hêñ habayto, ay nilumatêng hi Apo Jesus, ya ubat ha balayan Nazaret ha probinsyan Galilea, ta naghawawtismo ya kan Juan ha Ilog Jordan.

¹⁰ Hêñ inumawah ya ha lanêm, ay nahêlêk ni Apo Jesus ya langit ya biglan nagloat, haka inumaypa kana ya Espiritu ni Apo Namalyari hêñ nanad ha mihay pati-pati. ¹¹ Haka main habi ya ubat ha langit, ya wana, “Hika ya panlugurên kon Anak ya ampamahigla kangko.”

A ya napatuksô hi Apo Jesus hêñ antuksoen ya ni Satanas, ya diyablo
(Mateo 4:1-11; Lucas 4:1-13)

¹² Pangayari yan naghawawtismo hi Apo Jesus, ha Ilog Jordan, ay tampol yan impabita hêñ Espiritu ni Apo Namalyari ha legal ya kabalah-

^a 1:2 propeta.

balahan. ¹³ Atsi ya bayro hên apatapo ya allo, hên antuksoêñ ni Satanas, noa, a ya napatukso. Main bayron mangahilêb ya ayop ya kalamo na, noa, main anghel ya nipanawop kana.

Ya pamanagyat ni Apo Jesus ha apat ya unan nag-in tagahonol na
(Mateo 4:12-22; Lucas 4:14-15; 5:1-11)

¹⁴ Hêñ nakakulung yay na hi Juan Bautista, ay nag-orong hi Apo Jesus ha probinsyan Galilea, ta impamwang na bayro ya Mangêd ya Habi ya ubat kan Apo Namalyari. ¹⁵ Impamwang na, ya wana, “Nilumatêng ya panaon ya intakda ni Apo Namalyari, haka marani ya pamanlokop na, kabay paghêhêan yon talibatokan ya pamanyag kasalanan, haka maniwala kaw ha Mangêd ya Habi!”

¹⁶ Ha pammita ni Apo Jesus ha laylay hên Dagat-dagatan hên Galilea, ay nahêlêk nay loway mikapotoh pohêl, ya magdadakêp hên kênan lanêm, ya hi Andres haka hi Simon, ya ambanhagan lan Pedro. Hila ay ampayhabwag hên lambat ha lanêm, ta ampandakêp hila dayi hên kêna. ¹⁷ Hinabi na kanla, “Makihonol kaw kangko, ta daygêñ kataw hên mâmipakarani hên tawo kangko, ta êmêñ hila maniwala.” ¹⁸ Tampol lan imbalag ya lambat la, ta nakihonol hila kana.

¹⁹ Ha pammita lan Apo Jesus ha laylay hên lanêm, ay nahêlêk na ya maának ni Zebedeo, ya hi Santiago haka hi Juan ya ampamitoyo hên lambat la, bayro ha bangka la. ²⁰ Tampol nan hinagyat hi Santiago haka hi Juan hên makihonol kana. Imbalag lay tatang la ha bangka hên kalamoy pan-upaan la ha pamandakêp kênan lanêm, ta nakihonol hila etaman kan Apo Jesus hên nanad kan Simon haka Andres.

**Pamipaplag ni Apo Jesus hên narawak ya a angkahêlêk ya hinumapat
 ha mihay lalaki**
(Lucas 4:31-37)

²¹ Nilumatêng hilan Apo Jesus ha balayan Capernaum. Ha allon pamagsimba, ay nanoro ya bayro ha sinagoga la. ²² Naubuh hilan nag-êpapah ha panoro na, gawan ya panoro na, ay nanad panoro hên main tungkulun, alwan nanad ha panoro lan mánoron Kautuhan ni apo Moises.

²³ Bayro ha sinagoga, ay main lalaki ya hinapatan hên narawak ya a angkahêlêk. Nan-angaw ya hinumapat kana, ya wana, ²⁴ “Jesus ya taga-Nazaret, hinoy ampakiêménan mo kannaêñ? Labay mo kay hên parusaan? Muwang ko no hino ka. Hika ya banal, ya ayn hinon kasalanan, ya in-utoh ni Apo Namalyari.” ²⁵ Hêñ nagilam ni Apo Jesus ya hinabi nan hinumapat kanan hatoy lalaki, ay hinabyanan na ya, haka na ya impaplag, ya wana, “Paan kan maglabak! Mag-alíh ka ha hinapatan mo!” ²⁶ Intumba ya lalaki hên hatoy hinumapat kana, haka na ya imbuwad-buwad, bayo nag-alíh ya kanan lalaki hên ampan-angaw.

²⁷Nag-êpapah hilay atsi bayro, ta nihahabi hila, ya wanla, “Hino ya magkatoroaan hên hatsi? Mihay bayoy toro lawêh! Nag tungkulon haka kapangyarihan ya pami-utoh nan paypaplag hên nangarawak ya a angkahêlêk ya hinumapat ha tawo.” ²⁸Habaytoy dinyag ni Apo Jesus, ay tampol nibahwag ha boon probinsyan Galilea.

Namaalíh hi Apo Jesus hên hakit lan kal-atan ha bali lan Simon Pedro
(Mateo 8:14-17; Lucas 4:38-41)

²⁹Pamakaawah ni Apo Jesus ha sinagoga, hên kalamo na hi Santiago, hi Juan, hi Simon Pedro haka hi Andres, ay nagpakha hila ha bali lan Simon haka Andres. ³⁰Nalatngan lay ampo ni Simon, ha papag, hên main hadyay omot. Kabay pinikihabi la kan Apo Jesus ya paalihêh nay omot nan habaytoy bakêt, ya ampo ni Simon. ³¹Dinumani hi Apo Jesus kana, tinalan nay gamêt, ta impaimata na ya, haka naalíh ya omot na. Bayo namakan ya kanlan Apo Jesus.

³²Hêh ampinaboy nay allo, ay gintan la kan Apo Jesus ya nipaghakit, haka hilay hinapatan hên nangarawak ya a angkahêlêk. ³³Nagtspion ya boon balayan, ha ilwangan hên bali lan Simon. ³⁴Namaalíh hi Apo Jesus hên hino-hino kay na hên ya hakit la, haka impaplag nay nangarawak ya a angkahêlêk ya hinumapat kanlan kaatag. A na hila pinaulayan hên maghabi, ya impaplag na, gawan muwang la, ya hiyay Anak ni Apo Namalyari.

Nanoro hi Apo Jesus kanlan Israelita ha kal-atan sinagoga
(Lucas 4:42-44)

³⁵Dali allo pon, ay nammita yay na hi Apo Jesus ha mihay legal ya marayo ha tawo, ta nanalangin ya. ³⁶Noa, hilan Simon ay ampanapol kana. ³⁷Hêh natapol la ya, ay hinabi la kana, ya antapolên la yan kal-atan. ³⁸Noa, wana kanla, “Lakwên tamo pon ya balayan di ha mamalibot ha legal ya habaytsi. Dapat ko etaman hên ipamwang kanla ya Mangêd ya Habi ya ubat kan Apo Namalyari. Kabay atsi ko di.” ³⁹Nanoro yay na ha mal-at ya sinagoga lan Israelita ha boon probinsyan Galilea. Namipaplag ya hên nangarawak ya a angkahêlêk ya hinumapat hên namahakit kanlan atsi bayro.

Namaalíh hi Apo Jesus hên hakit ketong ha mihay lalaki
(Mateo 8:1-4; Lucas 5:12-16)

⁴⁰Minghan hên main kal-atan ya nangamat kan Apo Jesus, ay main dinumani kana, ya mihay lalaki ya nag hakit ketong. Nandoko ya ha arapan ni Apo Jesus, ta wanana nakiingalo, “Panginoon, no kalabayan mo, ay paalihêh moy hakit ko, êmêh luminis ya lawini ko.” ⁴¹Naingalwan ya ni Apo Jesus, kabay impalunto ni Apo Jesus ya gamêt na kana, ta

wana, “Labay kon paalihén ya hakit mo. Luminis ka!” ⁴²Tambéng naalíh ya hakit na. ⁴³Bayo in-utoh na ya ni Apo Jesus hén main panaad, ya wana, ⁴⁴“Paan mo pon ipamwang ya hatsi ha hinoman. Pakha ka ha pari ta ipahlék mo kana ya ayn kay nan ketong. Mantan kan maiparaya ha pamanhumonol mo ha utoh ni apo Moises,^b êmén paptégan kanlan kaatag ya malinis kay na.” ⁴⁵Noa, hén nammitta ya, ay impamwang nay pamipaálíh ni Apo Jesus hén ketong na, kabay lalon nibahwag ya kapangyarihan ni Apo Jesus, haka gawan ha kal-atan ya mabay manggilam hén toro na, ay a yay na makahowén ha hinon balayan bayro, ta a na hila makwan matoroañ hén mangéd. Kabay napaidi ya tana ha marayo ha balayan, êmbayro man, ay nilako la yan kal-atan ubat ha ayri man ya legal.

Ya mihay a ampakabita, ya in-arap kan Apo Jesus

(Mateo 9:1-8; Lucas 5:17-26)

2 ¹Hén nakalabah ya ungnoy allo, ay nag-orong hilan Apo Jesus ha balayan Capernaum. Ya pamanlumaténg na bayro, ay nibahwag. ²Kabay ni-tsi-tsipon ya kal-atan bayro, angga ha napno ya bali haka ayn nanan dyanan agyan ha arapan hén ilwangan. Kaban an-ipamwang kanla ni Apo Jesus ya habi ni Apo Namalyari, ay ³main nilumaténg ya apat ya lalaki ya ampantan hén mihay lumpo ya atsi ha langkayan. Iarap la ya dayi kan Apo Jesus. ⁴Noa, gawan ha kal-atan, ay ayn hilan madanan. Kabay nunik hila ha bubungan ta nilubtan lay atêp ha dapit ugto ni Apo Jesus. In-antotoh lay lumpo ha pibonakan lan kal-atan ha arapan ni Apo Jesus. ⁵Hén nahélék ni Apo Jesus ya paniwala la kana, ay hinabi na kanan lumpo, “Pakhawén moy nakém mo, ta pinatawad ya kasalanan mo.”

⁶Main bayro hén mónoron Kautuhan ni apo Moises, ya ampangihip hén êmén di, ⁷“Hinoy hatsi ya an-ipantag nay sarili na kan Apo Namalyari hén mamatawad hén kasalanan? Yarin a nan ammusmusén hi Apo Namalyari ya tawo yan bêngat! Mimiha na ni Apo Namalyari ya makapatawad hén kasalanan.”

⁸Tampol nan namwangan ni Apo Jesus ya laman ihip la. Kabay hinabi na kanla, “Pata ampangihip kaw hén êmbayro? ⁹Hino awud ya maparah hén habièn kanan mihay a ampakabita, no habièn ko, ‘Napatawad kay na ha kasalanan mo,’ o no habièn ko, ‘Hali, mirêng ka ta mita kay na.’ ¹⁰Noa, êmén yo mamwangan ya hiko, ya Taga-Langit, ya In-anak Tawo, ay main tungkulon di ha luta hén mamatawad kasalanan, ay habièn ko kanan lumpo, ¹¹‘Mirêng ka. Hapwatén moy langkayan mo ta muli kay na.’”

¹²Tambéng yan nirêng ha arapan la ya hata lumpo. Hinapwat nay langkayan na, ta nuli ya. Naubuh hilan nag-êpapah ya atsi bayro, kabay

^b 1:44 Levítico 14:2-33

pinuri la hi Apo Namalyari, ya wanla, “Amêhên allo ay nakahêlêk kitamo hên a tamo êt nahêlêk.”

**Hi Levi ya ambaêgên êt Mateo, ya máningil buwih, ay
hinagyat ni Apo Jesus
(Mateo 9:9-13; Lucas 5:27-32)**

¹³ Bayo nag-orong yay na hi Apo Jesus ha laylay Dagat-dagatan hên Galilea. Pinakikamat-kamatan yan kal-atan, kabay tinoroan na hila. ¹⁴ Pangayarin habayto, hên ampammita-bitâ ya, ay nakahêlêk yan mihay máningil buwih ya anak ni Alfeo, ya nag langan Levi, ya ampikno ha paningilan na. Hinabi ni Apo Jesus kana, ya wana, “Kihonol ka kangko.” Tampol ya etaman nakihonol kana.

¹⁵ Amêhên, hên atsi hilan Apo Jesus ha bali ni Levi hên ampangan, ay main nilumatêng ya kal-atan maningil buwih, ya kapareho ni Levi, haka kaatag êt ya makasalanan, ya ampakihonol kan Apo Jesus, ya kalamo la hên nangan. ¹⁶ Hêñ nahêlêk lan ungnoy mónoron Kautuhan ni apo Moises, ya Pariseo, ya ampangan hi Apo Jesus hên kalamo lan máningil buwih, haka kaatag êt ya makasalanan, ay nangotang hila kanlan tagahonol ni Apo Jesus, ya wanla, “Pata ampangan ya hên kalamo lan máningil buwih haka kaatag êt ya makasalanan?” ¹⁷ Hêñ nagilam nay hinabi la, ay nangalimbawa hi Apo Jesus, ya wana, “Hilay main hakit, ay ampangailangan doktor, alwan hilay ayn hakit. Êmbayro êt, atsi ko di ha luta ta êmén ko mahagyat hilay ampangamin makasalanan hila, hêñ maghêhê hên manalibokot ha pamanyag lan kasalanan. Noa, hilay ampaghabin ayn hilan kasalanan, ay a ko hawpan.”

**Pinakibatan ni Apo Jesus ya kotang tungkol ha pagtêeh hên a mangan
ta êmén a maabala ya panalangin
(Mateo 9:14-17; Lucas 5:33-39)**

¹⁸ Minghan hêñ nagtêeh hila hêñ a nangan, ta êmén a maabala ya panalangin la, ya tagahonol ni Juan Bautista haka hilay Pariseo, ay main ungnobayro ya naghabi kan Apo Jesus, ya wanla, “Hilay tagahonol ni Juan haka hilay tagahonol lan Pariseo, ay ampagtêeh hêñ a mangan, ta êmén a maabala ya panalangin la. Pata alwan êmbayro ya andaygêñ lan tagahonol mo?” ¹⁹ Kabay in-alimbawa ni Apo Jesus ya sarili na ha lalaki ya an-ikasal, ya wana, “Èndat yon a mangan ya bisita hêñ lalaki ya an-ikasal, no kalamo la ya? Siguradon mangan hila! ²⁰ Lumatêng ya allo ya ipakarayo ya lalaki ya an-ikasal, ay bayro hilay nan a mangan.”

²¹ Amêhên, intoro ni Apo Jesus ya a mailamo ya toro na, ha toro lan ninuno la, ya wana, “Ayn mamitagpi hêñ bayoy tela, ya a pon napihi, ha gihi hêñ manan takop. No alimbawa ta daygêñ nay habayto, ta pipiêñ nay na, ay kumpêh ya intakap, haka humlay ya gihi. ²² Ayn mamitugtug hêñ

bayon alak ha ubatan hēn manan alak gawan lumtoh ya pamyanan, haka mabulloq ya alak.^c Ya bayoy alak ay dapat itugtug ha bayon pamyanan.”

Ya toro ni Apo Jesus tungkol ha allon pamagsimba
(Mateo 12:1-8; Lucas 6:1-5)

23 Mihay allon pamagsimba, hēn nipadann hilan Apo Jesus ha nag trigo ya narani ha dann, ay nantē hilay tagahonol na hēn pērad. Kinētēb la kaban ampammita hila. 24 Noa, nag Pariseo bayro ya naghabi kan Apo Jesus, ya wanla, “Pata nantē hilay tagahonol mo hēn trigo ha allon pamagsimba, bawal man ya habayto ha Kautuhan tamo?” 25-26 Wana etaman ni Apo Jesus, “Kayno a yo pon nabaha ya dinyag ni Arin David hēn haton panaon, hēn hi Abiatar ay pinakapoon pari. Hēn habayto, hiya, haka hilay kalamo na ay angkablay hēn lonoh, kabay hinumwēn ya ha bali ni Apo Namalyari ta nangwa yan puto ya imparaēp kan Apo Namalyari ya pangkaēn bat hēn pari. Bawal man ha Kautuhan ni apo Moises hēn mangan hēn habayto, ay nangan ya, bayo nam-i ya êt kanlan kalamo na.” 27 Inhundo ni Apo Jesus ya pamaghabi na kanlan Pariseo, ya wana, “Ya allon pamagsimba ay ha ikakangēd hēn tawo. Ya tawo ay alwan ipoh hēn allon pamagsimba. 28 Hiko ya Taga-Langit, ya In-anak Tawo, ay nag tungkulon hēn maghabi no hinoy malyarin daygēn ha allon pamagsimba.”

Ya lalaki ya natsi ya mihay gamēt
(Mateo 12:9-14; Lucas 6:6-11)

3 1 Ha mihay na êt ya allon pamagsimba la, hēn hinumwēn hi Apo Jesus ha sinagoga ta manoro, ay main lalaki bayro ya natsi ya panabtab gamēt. 2 Hilay Pariseo haka mónoron Kautuhan ni apo Moises, ay ampangimaton kan Apo Jesus, no mamaalih yan hakit ha allon pamagsimba la, ta êmēn la yan bad-an hēn ampanyag yan bawal ha allon pamagsimba. 3 Wani Apo Jesus kanan lalaki ya natsi ya gamēt, “Mirēng ka di ha arapan lan kal-atan.” Dinyag nay kalabayan ni Apo Jesus. 4 Bayo kinotang ni Apo Jesus hilay Pariseo haka mónoron Kautuhan ni apo Moises, ya wana, “Hinoy nakahulat ha Kautuhan ni apo Moises ya tungkol ha dapat daygēn ha allon pamagsimba? Manyag hēn kangēran o manyag karawakan? Mamiligtas o mamatsi?” Noa, ayn miha man ya naghabi. 5 Amēhēn, inubuh na hilan hinlēk ni Apo Jesus hēn main huluk haka ingalo gawan ha kakdēyan ulo la. Bayo wana kanan lalaki ya natsi ya gamēt, “Ipaktang moy gamēt mo.” Hēn impaktang na, ay naalih ya hakit ha gamēt na. 6 Tampol hilan nammita ya hilay Pariseo, haka

^c 2:22 Ya pamyanan la hēn alak ay dyag ha balat kambing, kabay minghan lan bēngat magamit gawan angkumita.

kalamo lan kagampi ni Herodes Antipas, ay pinipupulungan lay na hi Apo Jesus.

⁷⁻⁸Hilan Apo Jesus etaman, ay nammitay na hēn palako ha laylay hēn Dagat-dagatan hēn Galilea. Main haday kal-atan ya taga-probinsyan Galilea ya nangamat kanlan Apo Jesus hēn manggilam toro na, haka magpaalih hēn hakit la. Main êt bayron kal-atan ya ubat ha probinsyan Judea, balayan Jerusalem, probinsyan Idumea, ha lipay hēn Ilog Jordan, ha balayan Tiro boy Sidon, haka ha mamalibot bayro. ⁹Gawan ha kal-atan, ay in-utoh nay tagahonol na, ya mamil-an hēn bangka ya mahakyān na ta êmēn ya a mapi-piitan hēn kal-atan. ¹⁰Gawan mal-at ya inalihan nan hakit, gap-an la ya dayi hi Apo Jesus hēn hilay nipaghakit ta êmēn maalih ya hakit la. ¹¹Hilay hinapatan hēn nangarawak ya a angkahēlēk, ay ampandoko ha arapan na haka ampihan-angaw hilay hinumapat kanla, ya wanla, “Hika ya Anak ni Apo Namalyari!” ¹²Noa, impakabawal na hila hēn ipamwang ya hiyay Mesias, ya Cristo.

Ya pamamili ni Apo Jesus hēn labinloway apostol

ya in-utoh na hēn manoro

(Mateo 10:1-4; Lucas 6:12-16)

¹³Bayo nilumakat hilan Apo Jesus ha mihay tawgtug. Hēn nakalakat hilay na, ay pinarani na hilay tagahonol na. ¹⁴Namili ya hēn labinlowa kanla ya pinata-ngalanan nan apostol ya panay nan makalamo, haka iutoh nan mamipamwang hēn Mangēd ya Habi, ¹⁵haka ya dyanan nan kapangyarihan hēn mamaalih hēn nangarawak ya a angkahēlēk ya hinumapat ha tawo. ¹⁶Habaytsi hilay labinlowa ya pinili na hēn mag-in apostol na: hi Simon, ya pinata-ngalanan nan Pedro, ¹⁷ya loway anak ni Zebedeo, hi Santiago haka hi Juan. (Pinata-ngalanan na hilan Boanerges, ya labay habiēn makhaw ya nakēm la.) ¹⁸Ya kaatag ay hi Andres, hi Felipe, hi Bartolome, hi Mateo, hi Tomas, haka hi Santiago ya anak ni Alfeo, hi Tadeo, hi Simon ya Makabayan, ¹⁹haka hi Judas Iscariote ya nay-upit kan Apo Jesus.

**Ya kapangyarihan ni Apo Jesus ay ubat kan Apo Namalyari, alwan
ubat kan Satanas**

(Mateo 12:22-32; Lucas 11:14-23; 12:10)

²⁰Hēn nuli hilan Apo Jesus, ay nipagtsipon hilay na êt ya kal-atan, kabay a lay na maarap hēn mangan hilan Apo Jesus. ²¹Nagilam lan kamag-anak ni Apo Jesus ya panhabiēn lan kaatag, ya angkamurit yay na, kabay nammita hilay na ta iuli la ya dayi.

²²Main bayron mónoron Kautuhan ni apo Moises ya nilumohan ya ubat ha Jerusalem. Hinabi la ya hi Apo Jesus ay hinapatan ni Satanas,^d

^d 3:22 Beelzebul ha habin Griego.

ya poon lan nangarawak ya a angkahêlêk. Haka hinabi la êt ya pamaalsh ni Apo Jesus hên nangarawak ya a angkahêlêk ya hinumapat ha tawo, ay ha kapangyarihan ni Satanas. ²³Pinarani na hilay habayto ta hinabi na kanlan paalimbawa, ya wana, “Yarin maipaplag ni Satanas ya sarili na! ²⁴No alimbawa ta mipapatsi ya angkalokopan hên mihay bansa, ay mahira ya habayto. ²⁵Êmbayro êt ya malyari ha mipapamília ya mipapatsi. ²⁶No mipapatsi hilay angkalokopan ni Satanas, ay mahira ya pamanlokop na.

²⁷“Hi Satanas ay nanad ha mihay makhaw, ya mal-at ya almas, ya ampamantay ha bali na. A makwa, ya hinon atsi kana, no a ya pon hambutêñ, haka gapohêñ. Noa, no gapohêñ ya, ay makwa ya kaganawan ya atsi kana.

²⁸“Pakagilamêñ yoy habaytsi. Mapatawad hilay mipaghêhê ha nadyag lay kasalanan, haka ha hinabi lan pamaniran kapareho lan tawo, ²⁹noa, ayn hinoman ya mapatawad ha hinabi lan pamaniran Espiritu ni Apo Namalyari. Ta habaytoy kasalanan, ay taganán ayn kapatawaran.”

³⁰Hinabi ni Apo Jesus ya habayto, ta êmêñ la mamwangan ya ha pangahabi la, ya hiyay hinapatan hên narawak ya a angkahêlêk, ay anhiraêñ lay Espiritu ni Apo Namalyari ya ampangubatan hên kapangyarihan ni Apo Jesus.

**Hilay ampanggilam habi ni Apo Jesus, ay anlugurêñ na hên nanad ha
pamanlugud na ha indo na, haka hilay patêl na**
(Mateo 12:46-50; Lucas 8:19-21)

³¹Hêñ nilumatêng ya indo ni Apo Jesus haka hilay patêl na, ay a hila midani kana gawan ha kal-atan. Kabay impabaêg la ya tana. ³²Main naghabi kana, ya wana, “Atsi di ha ilwangan ya indo mo haka hilay patêl mo. Labay la kan makahabi.” ³³Wani Apo Jesus kana, “Hino ya indo ko, haka hino hilay patêl ko?” ³⁴Hinlêk nay nakaiknon nakapalibot kana, ta wana, “Hilay habaytsi ya indo ko, haka hilay patêl ko. ³⁵Hilay ampanyag kalabayan ni Apo Namalyari, ay yabay ya anlugurêñ ko hên nanad ha pamanlugud ko ha indo ko, haka hilay patêl ko.”

Ya alimbawa ya tungkol ha bini ya inhabwag
(Mateo 13:1-9; Lucas 8:4-8)

4 ¹Nanoro yay na êt hi Apo Jesus ha laylay Dagat-dagatan hên Galilea. Gawan ha hadyay kal-atan ya ampiagtsipon hên labay manggilam toro na, ay hinumakay ya ha mihay bangka, ta bayro yan nikno hên nanoro kanlan hadyay kal-atan ya atsi ha laylay. ²Ha pamanoro na kanla, ay mal-at ya paalimbawa, ya wana, ³“Pakagilamêñ yoy habaytsi! Main mihay lalaki ya namihabwag hên bini. ⁴Ha pamihabwag nan bini, ay main bini ya natata ha dann. Habaytoy tinuktuk hên manok. ⁵Ya kaatag ay natata ha mabato. Tampol yan tinumubo, gawan ha mababo ya luta.

⁶Noa, hēn nangallo, ay nayanto ya, gawan a nipakalalē ya yamot. ⁷Ya kaatag ay natata ha kadiwian. Tinumubo ya bini, noa, a hinumlay gawan diwi. ⁸Ya kaatag ay natata ha mataba ya luta. Tinumubo ya habaytoy bini haka naubuh hēn nanagēy hēn main manimagatoh ya lahí, anêmapo, o tatlumpo hēn oman.” ⁹Hēn nahabi nay na ya habayto ni Apo Jesus, ay wana êt, “Pakaihipēn yoy nagilam yo!”

No pata paalimbawa ya panoro ni Apo Jesus

(Mateo 13:10-17; Lucas 8:9-10)

¹⁰Hēn nakabita hilay nay kal-atan, ay main tanan ungno bayro ya kalamo lan labinloway tagahonol ni Apo Jesus, ya nangotang no hinoy labay habiēn hēn habaytoy alimbawa. ¹¹Kabay wani Apo Jesus kanla, “Hikaw bat ya makamwang hēn inlihim ya tungkol ha pamanlokop ni Apo Namalyari, noa, kanlan kaatag ay anhabiēn ko ha alimbawan bēngat. ¹²Ta êmēn,

‘Manlēk hila man, ay a la mamwangan ya anhēlkēn la.

Manggilam hila man, ay a la maintindihan.

Ta kayno maintindihan la, haka maghēhē hilan dumani kan Apo Namalyari, bayo patawarēn hila.’ ”^e

Impamwang ni Apo Jesus ya labay habiēn hēn habaytoy alimbawa ya tungkol ha bini ya inhabwag

(Mateo 13:18-23; Lucas 8:11-15)

¹³Bayo wanay na êt kanlan tagahonol na, “Awta a yo angkaintindihan ya alimbawa ya tungkol ha bini ya inhabwag! Ay-êmēn yon maintindihan ya kaatag ya alimbawa! ¹⁴Ya ampamihabwag bini, ay ampamibahwag hēn habi ni Apo Namalyari. ¹⁵Ya nakēm tawo ay in-alimbawa ha natataan bini. Ya bini ya natata ha dann ay habi ni Apo Namalyari ya nagilam lan tawo, noa, tampol nilumatēng hi Satan, ta inalih nay habaytoy habi ha nakēm la. ¹⁶Ya bini ya natata ha kabatoan, ay habi ni Apo Namalyari ya tinanggap lan tawo hēn main kahiglaan, ¹⁷noa, a nimana ha nakēm la. Naniwala hila pon, noa, hēn nilumatēng ya kairapan o pamairap, ay tampol naalih ya paniwala la. ¹⁸Ya bini ya natata ha kadiwian ay habi ni Apo Namalyari ya ginilam lan tawo pon, ¹⁹noa, tampol nialih ha nakēm la, gawan ha kayagahan, pibandian, haka katsighaw hēn biyay la. Kabay a nabayo ya biyay la, hēn nanad ha a nanagēy ya bini ya inhabwag. ²⁰Ya bini ya inhabwag ha mataba ya luta ay habi ni Apo Namalyari ya ginilam lan tawo, bayo nimana ha nakēm la, ya nanad ha lahí ya naubuh hēn nanagēy hēn main manimagatoh ya lahí, anêmapo, o tatlumpon oman.”

^e 4:12 Isaias 6:9-10

**Ya atáng ay dapat idin ha taganán pamyanan
(Lucas 8:16-18)**

²¹ Wanay na êt ni Apo Jesus, “Ayn mamagkêt hên atáng, bayo halokoban. A etaman idin ya atáng ha hilong pangkatuluyan. Noa, ya atáng ay idin ha mantêg hên pamyanan atáng. ²² Ayn inhimpan ya a miawah. Ayn êt inlihim ya a mamwangan haka mihungbung. ²³ Hikaw ya ampanggilam, ay pakaihipên yoy habayto.”

²⁴ Inhundo ni Apo Jesus ya panoro na, ya wana, “Pakaihipên yoy angkagilam yo, ta no honolên yoy toro ko, ay taganán maintindihan yo. Ta no ay-êmén ya pamaytakal yon pamanggilam, ay êmbayro êt ya takal hên pamangintindi ya idin kamoyu ni Apo Namalyari. ²⁵ No honolên yoy toro ko, ay mapahanan ya pamangintindi yo, noa, no a yon honolên, ay alihêñ êt kamoyu ya pêpérâd ya naintindihan yo.”

**Ya pamanlokop ni Apo Namalyari ay in-alimbawa ni
Apo Jesus ha pamantumubo hên bini ya in-êhad**

²⁶ Wanay na êt ni Apo Jesus kanla, “Ya pamanlokop ni Apo Namalyari ay maialimbawa ha pamantumubo hên bini ya in-êhad hên mihay lalaki. ²⁷ Pinaulayan nan tinumubo, ta inhundo nay pamag-obra na hên allo-allo. Ya pamantumubon habayto, ay a na angkaintindihan no ay-êmén. ²⁸ Nag-in malakarayém ya habayto gawan ha luta, haka tinumubo angga ha nanagéy hên mangataba ya lahí. ²⁹ Hêñ nawtoy na, ay tampol nay nan ginapah gawan nilumaténg ya pamanggapah.”

**Ya pamanlokop ni Apo Namalyari, ay in-alimbawa ni Apo Jesus ha
pamtumubo hên mihay nanaway but-o
(Mateo 13:31-32, 34; Lucas 13:18-19)**

³⁰ Amêhêñ, inhundo ni Apo Jesus ya panoro na, ya wana, “Nanad hino kaya ya pamanlokop ni Apo Namalyari? Hino kaya ya pangialimbawaan ko hên pamanlokop na? ³¹ Ya pamanlokop ni Apo Namalyari ay maialimbawa ha pamantumubo hên mihay nanaway but-o ya intanêm. Iibon man ya but-o, ³² ay hinumlay yan nag-in kayo, kabay nipanyag halay ya manok-lalê ha hanga na.”

**Paalimbawa ya pamanoro ni Apo Jesus
(Mateo 13:34)**

³³ Mal-at pon ya êmbayroy alimbawa ya intoro ni Apo Jesus kanlan kal-atan ya agyu lan maintindihan. ³⁴ Hêñ nanoro hi Apo Jesus kanlan kal-atan, ay taganán mal-at ya alimbawa ha panoro na. Noa, hêñ hilahila tanay labinloway tagahonol na, ay inubuh nan impamulah kanla ya habayto.

Pinatunggên ni Apo Jesus ya hadyay angin
(Mateo 8:23-27; Lucas 8:22-25)

35 Habaytoy allo, hên yabi yana, ay hinabi ni Apo Jesus ha tagahonol na, “Magbangka kitamo hên lumipay ha dagat-dagatan.” 36 Imbalag lay kal-atan ta hinumakay hila ha bangka ya andyanan ni Apo Jesus, ta nag-umpisa hilay nan lumipay. Main êt hên kaatag ya bangka, ya nilumipay. 37 Amêhén, nagkamain hên hadyay angin, haka ya bangka la ay angkapnoy nan lanêm. 38 Hi Apo Jesus ay nabêlêw hên nakaulon ha dapit bulian hên bangka. Pinukaw la ya, ya wanla, “Máñoro! A mo muwang ya ampilêmêh kitamina?” 39 Nimata ya, ta pinatunggên nay angin haka hadyay tandulon. Tinunggên etaman ya angin haka hadyay tandulon. 40 Bayo wana kanlan tagahonol na, “Pata hadyay limo yo! Ayn kaw pon awud hên paniwala kangko!” 41 Na-êngap hila ha hadyay limo la, haka ha pag-êpapah la, ay niyahabi hilan êmén di, “Hino kayay hatsi ya ampamipatunggên hên angin haka tandulon bayo anhumonol hila kana?”

**Namaalíh hi Apo Jesus hên nangarawak ya a angkahêlêk, ya
 hinumapat kanan mihay lalaki ya Geraseno**
(Mateo 8:28-34; Lucas 8:26-39)

5 ¹Nilumatêng hilan Apo Jesus ha legal lan Geraseno^f ha lipay dagat-dagatan ha êtêb hên probinsyan Galilea. ²Pagtaoy ni Apo Jesus ha bangka, ay tinupa ya hên mihay lalaki ya hinapatan hên nangarawak ya a angkahêlêk ya ubat ha pay-ilbêngan. ³Ampaidi ya tana ha pay-ilbêngan. A la yay na maigapoh, hên taykala man. ⁴Kata-ungno lay nan an-igapoh, noa, panay nan pamboytoên ya taykala ha bitsih haka ha gamêt na. Ayn taganán ampakapatgên kana. ⁵Allo-yabin nagkotawan ya ha pay-ilbêngan haka ha kabung-oyan hên ampiangaw-angaw hên anhugatêng nay lawini na hên bato.

6 Hêñ nahêlêk na ya hi Apo Jesus ha marayo-dayo, nuwayu yan napaidani hên nandoko hên nakadêngdêng ha arapan na. ⁷Nan-angaw ya, ya wana, “Jesus, ya Anak ni Apo Namalyari ya ayn kapantag ha kapangyarihan, awta ampakiêménan mo ko? Maghumpa ka ha arapan ni Apo Namalyari, ya a mo kon parusaan!” ⁸Hinabi nay habayto gawan ampaalihêñ ni Apo Jesus ya nangarawak ya a angkahêlêk ya nipanhumapat kana. ⁹Amêhén, kinotang ya ni Apo Jesus, “Hinoy langan mo?” Wanlan hinumapat kana etaman, “Libo-Libo.” Hinabi lay habayto gawan mal-at hilay nangarawak ya a angkahêlêk ya nipanhumapat kana. ¹⁰Habaytoy nipanhumapat ay nakiingalo kan Apo Jesus, ya paan hila dayin ipaplag ha legal ya habayto.

^f 5:1 Gergeseno o Gadareno ha kaatag ya Kahulatan Griego.

¹¹ Main kal-atan baboy ya ampipambuk bayro ha talindah hēn bungoy ya nahēned ha dagat-dagatan. ¹² Nakiingalo hilay hinumapat hēn paulayan hila dayi hēn mipanhumapat kanlan baboy. ¹³ Pinaulayan na hila etaman ni Apo Jesus. Kabay inumalih hila kanan lalaki ta niphantumapat hila kanlan baboy. Hilay manga lowan liboy baboy ya hinapatan la, ay nipamwayun palohan ha natalindah ya laylay lanēm hēn nilêmêh ha dagat-dagatan.

¹⁴ Hilay manayhay hēn baboy, ay nipamwayu, ta habaytoy nalyari, ay impamwang la ha kabaryo haka kabalayan la. Hēn nagilam lan kaatag ya balita la, ay nilako lan hinlēk ya nalyari. ¹⁵ Hēn nilumatēng hila kanlan Apo Jesus ay nahēlēk lay lalaki ya inalihan nangarawak ya a angkahēlēk. Nakatakop yay na haka ampikno hēn napatēkbēk ya ihip. Naubuh hilan nalimwan ha kapangyarihan ni Apo Jesus. ¹⁶ Impamwang lan nakahēlēk no ay-êmēn yan namaalih hēn nangarawak ya a angkahēlēk ya hinumapat kanan lalaki, haka ya nalyari kanlan baboy. ¹⁷ Hēn nagilam lay habayto, ay nakiingalo hila kan Apo Jesus ya mag-alih ya ha legal la.

¹⁸ Hēn anhumakay yay na hi Apo Jesus ha bangka, ay nakiingalo ya inalihan nangarawak ya a angkahēlēk hēn gētan ya dayi. ¹⁹ A na ya pinaulayan, ta impaorong na ya ni Apo Jesus, ya wana, “Muli kay na ha bali mo ta ipamwang mo ya kangēran ya dinyag kamo hēn Panginoon, haka no ay-êmēn na kan iningalwan.” ²⁰ Nammita yay nay lalaki, ha mapoy balayan ha legal na, ya ambaégēn lan Decapolis, ta impamwang nay tungkol ha dinyag kana ni Apo Jesus, kabay naubuh hēn nipag-êpapah hilay nakagilam.

**Biniyay ya anak ya babayi ni Jairo haka pinaalih ya hakit hēn babayi
ya labinloway taon nanan ampaghakit**
(Mateo 9:18-26; Lucas 8:40-56)

²¹ Amêhēn, ha pag-orong lan Apo Jesus hēn nagbangkan ubat ha lipay, ay kal-atan ya nanupa kanla ha laylay lanēm. ²² Main dinumani hēn nandoko hēn nakadêngdêng ha bitsih ni Apo Jesus ya mihay ampamaala ha sinagoga, ya nag langan Jairo. ²³ Impapakahabi na kan Apo Jesus, ya kihonol ya kana ha bali na, ta ipalunto nay gamêt na ha anak nay babayi, hēn paalihēn dayi ya hakit na, ta êmēn ya mabiyay ya ampamêrad tanan matsu. ²⁴ Kabay nakihonol hilan Apo Jesus kan Jairo. Kal-atan ya nakihonol kanla haka ampi-pipiitan la hi Apo Jesus.

²⁵ Kalamo lan hata kal-atan, ya mihay babayi ya labinloway taon nanan ampag-irap ha hakit nan andayaén. ²⁶ Naiubuh nay na ya pibandian na ha hino-hino kay na hēn ya doktor, haka nairapan ya êt ha pamanambal la hēn hakit na, bayo nilumdêg êt ya habayto. ²⁷ Hēn namwangan na, ya tungkol kan Apo Jesus, ay dinumani ya kana hēn ginapa ya takop ni Apo Jesus. ²⁸ Dinyag nay habayto ta hinabi na ha sarili na, no magapa

nan bat ya takop ni Apo Jesus, ay maalíh ya hakit na. ²⁹Tambêng etaman tinunggên ya ampantoloy daya na, kabay natanam nay naalíh ya hakit na. ³⁰Tampol nan natanam ni Apo Jesus ya main inalihan hên hakit, gawan ha kapangyarihan na. Namalingay ya, ta wana, “Hinoy nakagapa hên takop ko?” Hêñ ayn mangamin, ay hinabi lan tagahonol na, ³¹“Panginoon, ampilolopungan la ka, haka la kan ampi-pipiitan hên kal-atan! Pata ampangotang ka no hinoy nakagapa kamo!” ³²Noa, ampakatapolên ni Apo Jesus no hinoy nakagapa kana. ³³Nalimwan ya babayi gawan muwang na ya nalyari kana. Kabay ampamêgpêg yan nandoko hên nakadêngdêng ha arapan ni Apo Jesus, ta inamin na ya hiyay nakagapa kana haka naalíh ya hakit na. ³⁴Wani Apo Jesus kanan babayi, “Inalíh ya hakit mo gawan ha paniwala mo kangko. Muli kay na, hên mapatékbék ya ihip ta inalíh ya hakit mo.”

³⁵Kaban ampaghabi ya pon hi Apo Jesus, ay main nilumatêng ya ubat ha bali ni Jairo, ya naghabi, “Natsi ya anak mo. A minan abalaêñ hi Apo Jesus hên maniraw ha bali.” ³⁶Noa, hên nagilam ni Apo Jesus ya habayto, ay wana kan Jairo, “Paan kan maglungkot. Ihundo moy paniwala mo ya maalíh koy hakit na.” ³⁷Kabay inhundo lay pammita la. Ya pinaulayan nan bêngat ni Apo Jesus hên makilako kanla, ay hi Pedro, hi Santiago haka hi Juan ya kapotoh pohêl ni Santiago. ³⁸Panlumatêng la ha bali lan Jairo, ay nahêlêk ni Apo Jesus ya ampipanangih haka ampipanyêngêñ ya atsi bayro. ³⁹Kabay hinabi na kanla, “Paan kaw manangih, ta a ya natsi. Nabêlêw yan bêngat.” ⁴⁰Kinailyan la ya hi Apo Jesus, ta muwang la ya pêtêg yay nan natsi. Hêñ naipaawah na hilay kal-atan ya atsi bayro, ay hinumwêñ yay na ha pinaypaketuluyan kanan anak, hêñ kalamoy toa na, haka ya tagahonol na hi Pedro, hi Juan, haka hi Santiago. ⁴¹Tinalan ni Apo Jesus ya gamêt nan anak, ta hinabi na, “Talita kumi,” ya labay habiêñ, “Anak ko, mimata ka.” ⁴²Tambêng yan nimata ya anak, haka namita-bitá. (Labinloway taon na.) Hadyay pag-êpapah lan atsi bayro. ⁴³Binawal na hila hêñ ipamwang ha kaatag ya biniyay nay anak. Hinabi na êt ya pakanêñ la ya.

**A ya pinaniwal-an hi Apo Jesus ha balayan Nazaret,
ya pinanhumlayan na**
(Mateo 13:53-58; Lucas 4:16-30)

6 ¹Amêhêñ, nuli ya hi Apo Jesus ha balayan Nazaret, ya pinanhumlayan na. Kalamo na hilay tagahonol na. ²Hêñ allon pamagsimba, ay hinumwêñ ya ha sinagoga la, ta nanoro ya. Haka ha pamanoro na, ay nipag-êpapah hilay nakgilam, ya wanla, “Ay-iri nan nakwa ya kamwangan na boy ya kapangyarihan na hêñ manyag hêñ kapapaêpapah? ³Daptay hiyay kalpintero ya kabalayan tamo ya anak ni Maria! Yarin alwan hiyay patêl lan Santiago, Jose, Judas, haka hi

Simon! Yarin alwan kabalyan tamo ya patêl nay babayi!” Kabay a la ya tinanggap.

⁴Bayo wani Apo Jesus kanla, “Hilay propeta ni Apo Namalyari, ay anggalangên ha agyan ayri ya logal, noa, a hila ampansinên hên kamaganak la haka kabalyan la.” ⁵Gawan ayn hilan paniwala kana, ay pérad bat ya inalihan nan hakit. Ayn kaatag ya kapapaêpapah ya dinyag na bayro ha Nazaret. ⁶Nag-êpapah hi Apo Jesus, ta taganán ayn hilan paniwala kana.

Inutuhan na hilan manoro ni Apo Jesus ya labinloway tagahonol na ya binaêg lan apostol
(Mateo 10:5-15; Lucas 9:1-6)

Bayo nanoro ya hi Apo Jesus ha mal-at ya baryo ha namalibot hên Nazaret. ⁷Haka tsinipon na ya labinloway tagahonol na, ta dinyanan na hilan kapangyarihan, hên mamaalih hên nangarawak ya a angkahêlêk ya hinumapat ha tawo, bayo in-utoh na hila hên manilowa hên manoro. ⁸Bayo hila nammita, ay hinabi na kanla, “Paan kaw mantan hên hinoman ya nanad ha puto, balutan, haka pera. Magtêkên kaw tana. ⁹Mag-apin kaw bitsih, noa, paan kaw mantan hên maihagili yoy takop. ¹⁰Magdahêl kaw ha balin managyat kamoyu, haka bayro kaw tana, hên angga ha a pon nayari ya pamanoro yo, ha logal ya habayto. ¹¹No a la kaw tanggapên, ta a hila mabay manggilam habi yo, ha mihay logal, ay bayo kaw mag-alih bayro, ay ikampag yoy tuwapok ya atsi ha bitsih yo, ta êmên la mamwangan ya atsi tana kanla no lumatêng kanla ya parusa ni Apo Namalyari.” ¹²Kabay nammita hilay nay labinlowa hên namipamwang ha kal-atan ya dapat lan paghêhêan hên talibatokan ya kasalanan la. ¹³Namaalih hila hên kal-atan nangarawak ya a angkahêlêk ya hinumapat ha tawo. Pinunihan lan pérad ya laro ya kal-atan nipaghakit haka namaalih hilan hakit la.

Ya kamatsan ni Juan Bautista
(Mateo 14:1-12; Lucas 9:7-9)

¹⁴Nagilam ni Herodes Antipas ya ampamaala ha probinsyan Galilea ya tungkol ha kapapaêpapah ya andaygên lan Apo Jesus, gawan habaytoy nibahwag. Main ampaghabin ampakadyag yan kapapaêpapah hi Apo Jesus gawan hiya hi Juan Bautista ya nangoman nabiyay. ¹⁵Main kaatag ya ampaghabin kayno hi Apo Jesus ay Propeta Elias, ya nag-orong ha luta. Hilay kaatag êt ay ampaghabi ya hi Apo Jesus ay nanad kanlan kaatag ya propeta, ya mámpamwang hên an-ipaihip kanla ni Apo Namalyari hên haton lagi.

¹⁶Noa, hên nagilam ni Herodes Antipas, ya anhabiên la, ay wana, “Ya ambaêgên lan Jesus, ay taganán hi Juan Bautista ya impapotoh kinay

ulo, ya nabiyyay oman, kabay ampakadyag yan kapapaêpapah!” ¹⁷Hinabi nay habayto gawan hên hato ay hiyay naypadakêp, naypagapoh, haka naypahukul kan Juan, gawan kan Herodias, ya ahawa ni Felipe, ya ali ni Herodes Antipas, ya bat nan pinag-ahawa ni Herodes Antipas. ¹⁸Panay nan an-ungkatén kan Herodes Antipas, ni Juan Bautista, ya wana, “Bawal ha Kautuhan ya pamag-ahawa mo kan Herodias ya ahawan ali mo!”

¹⁹Gawan habayto, ay main yan hakit nakêm hi Herodias kan Juan, haka ipapatsi na ya dayi, noa, ayn yan madyag, ²⁰gawan a na ya ampaulayan ni Herodes Antipas, ta anggalangên na hi Juan, gawan muwang na, ya mahonol hi Juan kan Apo Namalyari, haka ayn hilan mahabi ha biyay na. Labay-labay nan manggilam toro na, angkalipang man ya ihip na.

²¹Mihay allo nakaihip hi Herodias no ay-êmén na yan maipapatsi hi Juan Bautista. Hi Herodes Antipas, ay nagkaluto ha allon pamanémtêm ha pay-anak kana. Hinagyat na hilay manungkulán na, haka hilay ampamaala ha hundaloh, haka hilay mabandi ha probinsyan Galilea hên magpakahigla hên kalamo na. ²²Timmalék ya anak ni Herodias ha arapan hên kal-atan. Hinumigla hi Herodes Antipas haka hilay hinagyat na, ha pamagtalék nan dalaga, kabay wani Herodes Antipas kanan dalaga, ya idin na kana ya hinon pakikwaan na kana. ²³Nangako ya êt hên main kalamoy humpa, ya idin na kana ya kapitnan bandi na, no habaytoy labay na.

²⁴Inumawah ya dalaga ta kinotang nay indo na no hinoy pakikwaan na. Wana etaman ni Herodias, “Ya ulo ni Juan Bautista.” ²⁵Tampol yan nag-orong ya dalaga, hên dinumani kan Herodes Antipas, ta pinakikwaan na, ya tampol ipapotoh ya ulo ni Juan Bautista, ta idin kanan dalaga ya habayto, hên nakapalunto ha pinggan.

²⁶Hadyay lungkot ni Herodes Antipas hên pakikwaan kana hên dalaga ya habayto, noa, a na ya matanggian gawan naghumpa ya, haka gawan ha kal-atan. ²⁷Hên habayto êt, ay in-utoh nay mihay hundaloh ha hukulan hên potohêñ nay ulo ni Juan Bautista. Tampol ya etaman nammita ha hukulan ya habaytoy hundaloh, ta pinotoh nay ulo ni Juan, ²⁸hêñ indin ha pinggan, haka gintan kanan dalaga. Indin na etaman hên dalaga, ya habayto kan Herodias, ya indo na.

²⁹Hêñ namwangan lan tagahonol ni Juan ya nalyari kana, ay kingwa la ya bangkay na, haka lay na in-ilbêng.

Liman libo ya pinakan ni Apo Jesus (Mateo 14:13-21; Lucas 9:10-17; Juan 6:1-14)

³⁰Amêhêñ, hên nag-orong hilay nay labinloway tagahonol ni Apo Jesus ya in-utoh nan namitoro, ya ambaêgén la etaman hên apostol, ay ni-tsitsipon hila, ta in-ubuh lan in-istorya kana ya dinyag la haka intoro la.

³¹Noa, a la angkadambi ya pangan la, gawan kal-atan ya angkapiuubah

hên anlumatêng kanla. Kabay wani Apo Jesus kanla, “Magpainawa kitamo pon bayro ha legal ya kabalah-balahan.”³² Kabay hila-hila tanay himmakay ha bangka hên naglipay ha legal ya kabalah-balahan.

³³Noa, napansin lan kal-atan ya pamag-alih la, haka ya pagpalakwan la, kabay binitisih lan inunaan hilan Apo Jesus, hên kalamo hilay ubat ha kaganawan balayan ya dinanan la.³⁴Hên pataoy hilan Apo Jesus ha bangka, ay nahêlêk lay kal-atan, haka naingalwan na hila, gawan nanad hilan tupa ya ayn pastol, kabay mal-at ya intoro na kanla.³⁵Hên maranin matata ya allo, ay hinabi lan tagahonol na kana, ya wanla, “Ayn bali di, haka maranin matata ya allo.³⁶Dayi ipalako mo hilay kal-atan ha balang baryo, ya narani di, ta êmén hila makahaliw hên maêkan la.”³⁷Noa, hinabi na kanla, ya wana, “Hikaw tanay mamakan kanla.” Kabay wanla kana, “Labay mon habiên, hikay ya manaliw hên pamangan lan kal-atan, ya magkaalaga hên upa hên mihay katawo ha waloy buwan!”³⁸Nangotang hi Apo Jesus, “Ungnoy puto yo? Hêlkên yo.” Hên namwangan lay na, ay hinabi la, “Li-limay puto haka lo-loway kênan lanêm.”

³⁹Bayo in-utoh ni Apo Jesus ha tagahonol na ya paiknoêñ lay kal-atan hên pusto-pusto. ⁴⁰Kabay nipammikno hilay na hên pusto-pusto ya main mani-magatoh haka main mani-limampo. ⁴¹Dinampot ni Apo Jesus ya limay puto haka loway kênan lanêm. Naningla ya, ta pinahalamatan nay habayto kan Apo Namalyari. Pino-potoh nay na, ta indin na kanlan tagahonol na, ta intayak la kanlan kal-atan. ⁴²Balang miha ya atsi bayro ay nakaêkan angga ha nangabhoj hila. ⁴³Hên tsinipon la ya tagan, ay nakapno hila êt hên labinloway lubon. ⁴⁴Main liman libo ya lalaki ya nangan.^g

Nammita hi Apo Jesus ha babon lanêm (Mateo 14:22-33; Juan 6:16-21)

⁴⁵Tampol nan pinahakay ni Apo Jesus ha bangka hilay tagahonol na, hên impauna hên lumipay ha Betsaida, kaban ampauliêñ na pon ya kal-atan. ⁴⁶Hên nagtsipan ya kanla hi Apo Jesus, ay nilumakat yay nan nanalangin. ⁴⁷Hên yabi yana, kaban ampanalangin yan miha na, ay atsi hilay na ha bonak dagat-dagatan ya tagahonol na. ⁴⁸Nahêlêk na hilay angkairapan hên lumipay, gawan panhalungatêñ hilan angin. Hên nawatah, ay nilako na hila hên nammita ha babon lanêm, hên makipantag ya dayi kanla, ⁴⁹noa, hên nahêlêk la yay ampita ha babon lanêm, ay nipaŋ-angaw hila, ta êndat la no hiyay mihay kamana. ⁵⁰Naubuh hilan nakahêlêk kana, haka hadayay limo la. Noa, tampol nan hinabi kanla, ya wana, “Paan kaw malimo! Pakhawêñ yoy nakêm yo!

^g 6:44 Main êt kal-atan ya babayi haka anak ya nangan. Mateo 14:21

Hikoy habaytsi!” ⁵¹Hêñ nakahakay yay na ha bangka, ay tinunggêñ ya angin. Hadyay êpapah la kana, ⁵²gawan nahêlêk la man, ya pinalakê nay puto, ay a la pon angkaintindihan ya madyag nay hinoman, ha kapangyarihan ni Apo Namalyari, ta taganán a la makwan ihipêñ ya nalyari.

**Namaalíh hi Apo Jesus hêñ kaganawan hakit
lan taga-balayan Genesaret
(Mateo 14:34-36)**

⁵³Pamakalipay lan Apo Jesus, ay impadann lay bangka ha dani hêñ Genesaret. ⁵⁴Hêñ nakataoy hilan Apo Jesus, ay tampol la yan nabalyan. ⁵⁵Pinarah lan impamwang ha boon legal ya habayto, ya nilumatêng hilan Apo Jesus. Kabay hinapwat la hila ha angkatuluyan la ya nipaghakit hêñ gintan kana ay-iri man ya nilako na. ⁵⁶Anto man ya lakwêñ nay balayan, baryo, o hinon legal ya main bali, ay anggêtan la ha andanan na, ya nipaghakit. Ampakiingalo hila kan Apo Jesus, ya agyan laylayan dayin takop na, ya magapa lan ampaghakit. Haka hilay nakagapa takop na, ay naalihan etaman hakit.

**Ya natotoan la ha ninuno, ay paan itad ha Kautuhan ni Apo Namalyari
(Mateo 15:1-9)**

7 ¹Panga-ubat hêñ habayto, ay main ungnoy Pariseo haka mánoron Kautuhan ni apo Moises ya ubat ha balayan Jerusalem ya nipandumani kan Apo Jesus. ²Nadambi la ya main tagahonol ni Apo Jesus ya bat hêñ nangan hêñ a hinumonol ha natotoan la ha ninuno, no ay-êmêñ ya pamag-uyah bayo mangan. Kabay êndat lan Pariseo, ya marêmêk hilay tagahonol na, ha hêlêk ni Apo Namalyari, ³ta hilay Pariseo haka hilay kaatag pon ya Israelita, ay a mangan no a hila pon nag-uyah hêñ nanad ha natotoan la ha ninuno. ⁴Haka a lan bat angkaêñ ya ubat ha palengke, no a la pon uyahan.^h Mal-at pon ya natotoan la ha ninuno ya anhonolêñ la ya tungkol ha pamanguyah hêñ pamminêman, pamyanan lanêm haka kaldero ya dyag ha tangso.

⁵Kabay nangotang hila kan Apo Jesus ya hilay Pariseo, haka mánoron Kautuhan ni apo Moises, ya wanla, “Pata a hila anhumonol ya tagahonol mo ha natotoan tamo ha ninuno tamo, no ay-êmêñ ya pamag-uyah bayo mangan?” ⁶Wani Apo Jesus, “Pêtêg ya impapêt ni Propeta Isaias ya tungkol kamoyun mapagbabara, ya wana ha Kahulatan ya impahulat ni Apo Namalyari,

^h 7:4 Ha kaatag Kahulatan Griego, ay nakahulat ya “A hila bat ampangan no ubat hila ha palengke, no a hila pon nag-uyah o nagpalyu.” Ta kayno narêmêkan hila ha hêlêk ni Apo Namalyari hêñ nakapakidani hila ha bawal ha natotoan la ha ninuno.

‘Ya pamagpuri la kangko, ay atsin bat ha bêbêy la, ta ayn ha nakêm la.

⁷Ayn kapukat-pukat ya pamagsimba la kangko, ta ya natotoan la ha ninuno, ay an-itoro la hên nanad ha paytoro la hên Kautuhan ko.ⁱ

⁸Angkapaulayan yoy Kautuhan ni Apo Namalyari, ta anhonolên yoy natotoan yo ha ninuno yo.”

⁹Bayo wana êt ni Apo Jesus, “Magaling kaw hên itad hên ayn alagá ya utoh ni Apo Namalyari, mahonol yon bat ya natotoan yo ha ninuno! ¹⁰Ta ya impahulat ni Apo Namalyari kan apo Moises, ay êmên di, ‘Galangên moy tatang haka indo mo,’ haka ‘Hinoman ya maniran toa na, ay dapat patsên.’ ¹¹Noa, an-itoro yo ya malyarin ialay kan Apo Namalyari, ya dapat ihawop ha toa. ¹²Ha pamanoro yon habayto, ay an-ibawal yoy pamanawop ha toa, ¹³ta antuwarêن yoy ninuno yo, hên an-itad yon ayn alagá ya Habi ni Apo Namalyari. Haka kal-atan pon ya êmbahêن ya andaygên yo.”

**Ya ampakarêmêk ha hêlêk ni Apo Namalyari ay angkaubat ha nakêm
(Mateo 15:10-20)**

¹⁴Bayo pinarani ni Apo Jesus ya kal-atan, ta wana kanla, “Manggilam kaw haka pakaintindiên yoy habaytsi. ¹⁵Alwan ya an-ihubo ha bêbêy ya ampakarêmêk hên tawo ha hêlêk ni Apo Namalyari, noa, ya ampakarêmêk, ay ya nangarawak ya habi ya angkaubat ha bêbêy.

¹⁶(Pakaihipên yoy nagilam yo!)”

¹⁷Pamakayari nan naghabi, ay imbalag ni Apo Jesus ya kal-atan, ta hinumwên ya ha lalên bali. Bayo nangotang hilay tagahonol na no hinoy labay habiên hên habaytoy alimbawa. ¹⁸Wana etaman kanla, “Hikaw man, ay a kaw ampakaintindi? Alwan pamangan ya an-ihubo ha bêbêy ya ampakarêmêk hên tawo ha hêlêk ni Apo Namalyari. ¹⁹Ta ya pamangan, ay a ampidann ha nakêm, noa, ha bitoka bayo itaká.” Ha pangahabi ni Apo Jesus hên habayto, ay labay nan habiên ya ayn bawal ya pamangan. ²⁰Inhundo ni Apo Jesus ya pamaghabí na, ya wana, “Ta ya nangarawak ya habi ya angkaubat ha bêbêy, ay yabay ya ampakarêmêk hên tawo ha hêlêk ni Apo Namalyari. ²¹Ta angkaubat ha nakêm ya kaihipan hên manyag karawakan, nanad ha manyag karawakan kalabayan lawini, manakaw, mamatsin kaparehon tawo, ²²makilalaki haka mamabayi, manyag kapanalarêhan, haka kaganawan karawakan nanad ha pamanloko, manyag kagatéan hên ayn pamagpigil ha sarili, bat maridya, maniran kapareho, mag-in mayabang, haka manyag ayn kapukatan. ²³Kaganawan hên habayto ay angkaubat ha nakêm haka ampakarêmêk ha hêlêk ni Apo Namalyari.”

ⁱ 7:7 Isaias 29:13

Ya paniwala hên mihay babayi ya alwan Israelita
(Mateo 15:21-28)

²⁴ Immalih hilan Apo Jesus bayro hên palako ha Tiro ya legal hên alwan Israelita, haka hinumwêñ hila ha mihay bali bayro. A na labay hên mamwangan hên kaatag ya atsi hila bayro, ta magpainawa hila dayi, noa, napansinan hila. ²⁵ Main bayron babayi ya nag anak ya hinapatan narawak ya a angkahêlêk, ya tampol hên nakamwang hên atsi ya bayro, kabay nilumatêng yan nandoko hên nakadêngdêng ha arapan na. ²⁶ Habaytoy babayi ay alwan Israelita ta hiyay Griego ya taga-Sirofenicia. Nakiingalo ya kan Apo Jesus ya ipaplag ya hinumapat ha anak nay babayi. ²⁷ Wani Apo Jesus kana, “Pakangérén ko pon hên toroan haka hawpan ya hilay Israelita. Ta habaytoy taganán usto.” ²⁸ Noa, hinabi nan babayi, ya wana, “Panginoon, mangêd ya habayto, noa, yarin a minan hawpan ya alwan Israelita no haday pamairap ya angkatanam la!” ²⁹ Bayo wana kana, “Gawan ha paniwala mo kangko, ay muli kay na, ta naipaplag ya hinumapat ha anak mo.” ³⁰ Hêñ nuli ya habaytoy babayi, ay nalatngan nay anak nay ampamatuloy hên napatékbék ha papag gawan naipaplag ya hinumapat kana.

**Ya têkkêñ haka a makayn makahabi, ay
 pinahabi haka pinagilam ni Apo Jesus**

³¹ Ha pag-orong lan Apo Jesus hên ubat ha legal Tiro ay nagdann ya ha legal hên Sidon ha palakon Dagat-dagatan hên Galilea ha mapoy balayan ha legal, ya ambaégén lan Decapolis. ³² Main ungnو bayro ya nantan kan Apo Jesus hên mihay lalaki ya têkkêñ haka a makayn makahabi. Nakiingalo hila kana ya ipalunto nay gamêt kanan têkkêñ ta pailihêñ nay hakit na. ³³ Indayo ni Apo Jesus ya lalaki kanlan kal-atan, ta ingkulug nay panoro na ha têkk nan lalaki, pangayari, ay nandula ya ha gamêt na ta impunih na ha dila nan lalaki. ³⁴ Naningla hi Apo Jesus ha langit hên nakauyamêñ ha panalangin na, bayo wana kanan lalaki, “Effata!” ya labay habiên, “Magloat!” ³⁵ Tampol ya etaman nakagilam haka nakapaghabi yay nan mangêd. ³⁶ Kata-ungno na hilan binawal ni Apo Jesus ya paan lan ipamwang ya habayto. Noa, lalo lan impamwang. ³⁷ Hadyay épapah la, ya wanla, “Mangêd ya kaganawan andaygén na. Ampagilamên nay têkkêñ haka ampahabiên nay pipi!”

Apat ya libo ya pinakan ni Apo Jesus
(Mateo 15:32-39)

8 ¹ Hêñ habayto, ay naka-tsipon hilay na êt ya kal-atan ya nanggilam hên toro ni Apo Jesus. Hêñ ayn hilay nan maêkan, ay binaêg ni

J 7:29 Ha pamipaplag ni Apo Jesus ha hinumapat ha anak hên alwan Israelita, ay mamwangan ya anhêlêkni ni Apo Namalyari ya laman hên nakêm hên balang miha, ayn kana no hinoy ninuno la.

Apo Jesus ya tagahonol na, ta wana kanla, ²“Kaingalo hilay kal-atan, ta tatloy nay allo la di, haka ayn hilay nan maékan. ³No pauliên ko hilan angkablay lonoh, ay kayno mawé hila ha dann, ta marayo ya ubatan lan kaatag.” ⁴Wanlan tagahonol na etaman, “Ay-êmén tamo hilan mapakan ya hata kal-atan di ha kabalah-balahan?” ⁵Kinotang hila ni Apo Jesus, ya wana, “Main kitamo pon hén puto?” Wanla kana, “Main tanan pito.”

⁶Bayo pinaikno na hilay kal-atan, haka na dinampot ya pitoy puto, ta impahalamat na kan Apo Namalyari, bayo pino-potoh nay habayto, ta impatayak na kanlan tagahonol na. ⁷Main hila etaman hén ungnoy nanganaway kénan laném ya pinirito. Impahalamat na êt kan Apo Namalyari ya habayto, bayo impatayak na etaman kanlan tagahonol na. ⁸Naubuh hilan nangabhoj ya kal-atan, haka hén tsinipon lay tagan, ay nakapno hila hén pitoy lubon. ⁹Main manga apat ya libo ya nangabhoj. Bayo nagtsipan yay na kanla. ¹⁰Hilan Apo Jesus etaman, ay hinumakay ha bangka hén palako ha legal hén Dalmanuta.

Ampanapol hilay Pariseo hén kapapaépapah ya ubat ha langit
(Mateo 16:1-4)

¹¹Main ungnoy Pariseo ya nilumaténg, ta pinakihubakan la ya hi Apo Jesus. Sinubuk la yan mamipahlék yan kapapaépapah ya ubat ha langit, ta êmén la mamwangan no pêtèg hén atsi kana ya kapangyarihan ni Apo Namalyari. ¹²Nakauyaméh ya hi Apo Jesus, bayo wana, “Hay! Awta ampanapol kaw hén kapapaépapah! Pakagilamén yo! Taganán ayn ipahlék kamoyu ya palatandaan ya hikoy in-utoh ni Apo Namalyari!” ¹³Bayo nilakwanan na hilay na, ta himmakay hilay na ha bangka hén palipay hilan Apo Jesus.

In-alimbawa ni Apo Jesus ha pampaalsa, ya panapol lan Pariseo hén kapapaépapah ya ubat ha langit
(Mateo 16:5-12)

¹⁴Naliwaan lan tagahonol ni Apo Jesus hén mantan puto, kabay mimiha tanay puto ya atsi ha bangka. ¹⁵Bayo binilinan hila ni Apo Jesus ya wana, “Kaillag kaw ha pampaalsa lan Pariseo haka ha pampaalsa ni Herodes Antipas.” ¹⁶Gawan ha hinabi ni Apo Jesus, ay êndat lan tagahonol na no mantèg pampaalsa hén arina ya hinabi na kanla, kabay nihahabi hila, ya wanla, “Hinabi nay habayto gawan a kitamo nakagétan puto.” ¹⁷Muwang ni Apo Jesus ya ampihabian la, kabay wana kanla, “Pata an-ikayagah yoy a kaw nakagétan puto! A kaw pon awud hén ampakaintindi! A yo pon angkakwan ihipén no ay-irin ubat ya kapangyarihan ko! ¹⁸Nanad kaw ayn mata, haka ayn têkk! Naliwaan yoy na lawéh hén pinakan koy liman libo ha li-limay puto! ¹⁹Ungnoy lubon ya napno hén tagan ya tsinipon yo?” Wanla kana, “Labinloway lubon.”

²⁰ Wanay na êt ni Apo Jesus, “Haka ungnoy lubon ya napno hên tagan ya tsinipon yo hên pinakan koy apat ya libo ha pi-pitoy puto?” Wanla etaman, “Pitoy lubon.” ²¹ Bayo wana kanla, “A kaw pon ampakaintindi?”

Naypamukat hi Apo Jesus hên mihay buwag ha balayan Betsaida

²² Hêñ nilumatêng hilan Apo Jesus ha balayan Betsaida, ay main ungno bayro ya nantan hên mihay lalaki ya buwag, ya pinakiingalo la kan Apo Jesus. ²³ Inakay ni Apo Jesus ya buwag hên indayo ha balayan. Bayo nandula ya ha gamêt na, ta impunih na ha mata nan buwag, bayo impalunto nay gamêt na kana, haka kinotang na ya, no ampakahêlêk yay na. ²⁴ Wana etaman hên buwag, “Naburarêg pon ya angkahêlêk ko, ya tawoy ampammita, ay nanad kayo.” ²⁵ Inapoap nan oman ni Apo Jesus ya mata nan lalaki. Kanan habayto, ay impakamukat nan lalaki ya mata na, haka alway nan naburarêg ya hêlêk na, ta ampakahêlêk yay nan mangêd. ²⁶ Bayo nagtsipan hi Apo Jesus kana, ta wana, “Muli kay na, noa, paan kan magdann ha baryo.”

**Hinabi ni Pedro ya hi Apo Jesus, ay hiyay Mesias, ya Cristo, ya
impangakon Mámiligtas**

(Mateo 16:13-20; Lucas 9:18-21)

²⁷ Bayo nammita hilan Apo Jesus palako ha balang baryo ya angkasakopan hên balayan Cesarea Filipos. Kaban ampita hila, ay kinotang nay tagahonol na, ya wana, “Hino ko kano?” ²⁸ Kabay hinabi la, “Wanlan kaatag ya hika ay hi Juan Bautista. Noa, wanlan kaatag êt ya hika ay hi Propeta Elias. Hilay kaatag êt ay ampaghabin ya nabiyay oman ya miha kanlan unan mâmipamwang hên an-ipaihip kanla ni Apo Namalyari.” ²⁹ Wana êt kanla ni Apo Jesus, “Kamoyu etaman, hino ko ha ihip yo?” Wani Pedro etaman, “Hika ya Mesias, ya Cristo, ya impangakon Mámiligtas ya pinili ni Apo Namalyari hên mamaala.” ³⁰ Noa, impapakabawal na hila hên ipamwang ha hinoman ya hiyay Cristo.

Impamwang ni Apo Jesus ya hiyay patsêñ

(Mateo 16:21-28; Lucas 9:22-27)

³¹ Bayo impamwang ni Apo Jesus kanlan tagahonol na, ya malyari kana lumatêng ya allo, ya wana, “Hiko ya Taga-Langit, ya In-anak Tawo, ay kailangan magdanas hên hadyay pamagdusa. Hikoy araêñ lan mánoron Kautuhan ni apo Moises. Araêñ la kon toa ya nag tungkulon ha bansa, haka araêñ la ko êt hên ampamaala kanlan pari. Ipapatsi la ko, noa, ha ikatlon allo ay biyayêñ akon oman.” ³² Impapakamulah ni Apo Jesus ya habayto kanla. Kabay indayo yan pêrad ni Pedro ta hinabyanan na ya, gawan êndat nan a patsêñ ya Mesias, ya Cristo. ³³ Noa, immarap hi Apo Jesus ha kaatag ya tagahonol na, bayo hinabyanan na hi Pedro,

ya wana, “Pedro, paan mo kon tuksoêñ hên nanad ha pamanukso kangko ni Satanas! Ya pan-ihipêñ mo ay alwan kaihipan ni Apo Namalyari, noa, kaihipan hên tawo!”

³⁴ Bayo pinarani nay kal-atan hên kalamoy tagahonol na, ta wana kanla, “Hilay labay hên humonol kangko, ay dapat liwaan ya sarili lan kalabayan haka humonol kangko. Dapat nakal-an hilan magtêêh hên pamairap haka matsu, ya maialimbawa ha pamakay hên nabyat ya koros. ³⁵ Hila etaman ya a anhumonol kangko, gawan a la labay hên matsu o mangoman ya pamimiyay la, ay matsu etaman. Noa, hilay matsu gawan ha paniwala la kangko haka ha pamipamwang lan Mangêd ya Habi tungkol kangko, ay dyanan biyay ya ayn angga. ³⁶ Mikamihan man kanan mihay tawo ya pibandian di ha luta, ay a na mapakinabangnan ya habayto, no hiya etaman ay mipalako ha kaparusaan ya ayn angga! ³⁷ Yarin matanggap ya pibandian na, ta êmén a mipalako ha kaparusaan ya ayn angga ya kaélwa na! ³⁸ Hilay tawo amêhén ay taganán makasalanan, haka tinalibatokan la hi Apo Namalyari. No araêñ la ko, ya Taga-Langit, ya In-anak Tawo, haka no araêñ lay toro ko, ay araêñ ko hila êt ha pag-orong ko di. Ha pag-orong ko, ay atsi kangko ya kapahilêw ya kahampatan ni Apo Namalyari, ya Tatang ko, haka kalamo ko hilay anghel na.”

9 ¹Inhundo ni Apo Jesus ya pamaghabi na kanlan tagahonol na, ya wana, “Pakagilamén yoy habaytsi, ya main ungno di kamoyu ya a matsu angga ha mahêlêk la, ya nilumatêng ya pamanlokop ni Apo Namalyari hên main kapangyarihan.”

Ampihahabi hi Apo Jesus, hi apo Moises, haka hi apo Elias
(Mateo 17:1-13; Lucas 9:28-36)

²Hêñ nalabah ya anêm ya allo paubat hên hinabi nay habayto ni Apo Jesus, ay pinaglamo na hi Pedro, hi Juan haka hi Santiago, hên nilumakat ha matag-ay ya tawtgug hên kakapag la. Kaban atsi hila bayro, ay naoman ya itsura ni Apo Jesus. ³Ya takop na ay nag-in bapan putsi ya kapahilêw, ya ayn kapantag ha kaputsian. ⁴Namakonkaynaman ay main loway mámpipamwang ya an-ipaihip kanla ni Apo Namalyari ya ubat ha langit, ya hi apo Moises haka hi apo Elias ya kalamo ni Apo Jesus hên ampihahabi. ⁵Bayo hinabi ni Pedro, ya wana, “Mánoro, mangêd ya atsi kitamo di. Manyag kay hên tatloy hawong. Miha kamo, miha kan apo Moises, haka miha kan apo Elias.” ⁶Hinabi nay habayto ni Pedro gawan nakatsigag ya haka hilan Juan. ⁷Ampaghabi ya pon hi Pedro hên inupungan hila hên ginêm, haka main hilan nagilam ya habi ya ubat ha ginêm, ya wanana habi, “Hatsi ya anlugarûñ kon anak. Gilamén yoy anhabiêñ na.” ⁸Hêñ tinunggêñ ya habi, ay nanlêk hilan Pedro ha palibot, noa, mimiha na tana ni Apo Jesus ya angkahêlêk la.

⁹Ha paglohan la hên ubat ha tawgtug, ay impapakabawal ni Apo Jesus hilay habaytoy tatloy tagahonol na hên ipamwang ha hinoman ya nahêlêk la ha tawgtug, angga ha a ya pon matsi haka mabiyay oman, ya hiya, ya Taga-Langit, ya In-anak Tawo. ¹⁰Kabay a la impamwang ya habayto ha hinoman. Pinihahabian la no hinoy labay habiên ya mabiyay yan oman. ¹¹Gawan nahêlêk la bayro ha tawgtug hi apo Elias, ay kinotang la ya, ya wanla, “Awta panhabiên lan móron Kautuhan ni apo Moises, ya kailangan mag-orong ya pon di ha luta hi apo Elias bayo ya lumatêng ya Mesias, ya Cristo, ya impangakon Mámiligtas ya pinili ni Apo Namalyari hên mamaala?” ¹²Wana etaman ni Apo Jesus, “Taganán nakahulat^k ha habi ni Apo Namalyari ya main nanad kan apo Elias ya manlêan hên nakêm ha pamanlumatêng ko. Haka nakahulat^l etaman ya hiko, ya Taga-Langit, ya In-anak Tawo, ay araên haka dapat magtêh hên hadayay pamagdusa. ¹³Noa, anhabiên ko kamoyu, ya nilumatêng yay na ya nanad^m kan apo Elias, haka a la ya nabalyan, ya hiyay habayto ya lumatêng bayo ya lumatêng ya Mesias, ya Cristo, ta dinyag la kana, ya labay la, hên nanad ha impamwang ha Kahulatanⁿ ya tungkol kana.”

Namipaplag hi Apo Jesus hên hinumapat hên ampamatugaw ha mihay anak ya lalaki
(Mateo 17:14-21; Lucas 9:37-43a)

¹⁴Hêñ nakalohan hilay na ha tawgtug, hêñ marani hilay na ha andyanan lan kaatag ya tagahonol na, ay nahêlêk lay kal-atan ya nakapalibot kanla. Haka napansin la ya main móron Kautuhan ni apo Moises ya ampakihubak kanla. ¹⁵Hêñ nahêlêk lan kal-atan hi Apo Jesus, ay nipag-épapah hilan nuwayun nanupa kana. ¹⁶Kinotang ni Apo Jesus hilay tagahonol na ya wana, “Hinoy ampiuhubakan yo?”

¹⁷Wanan miha bayro, “Máñoro, gintan ko di kamo ya anak koy lalaki, ya anhapatán hêñ narawak ya a angkahêlêk, haka a yay na ampakahabi. ¹⁸No andawhongén na yan anhumapat kana, ay an-itumba na ya ha luta, bayo maggalañ ya bêbêy na. Ampag-nge-ngêt ya, haka angkumdêy ya lawini na. Pinakihabi kina ha tagahonol mo ya paalihêñ lay hinumapat, noa, a la ya agyu hêñ paalihêñ.”

¹⁹Kabay wani Apo Jesus, “Hikaw ya angkabiyyay amêhêñ ay ayn paniwala! Aydin angga kataw hêñ pakilamoan haka pakitagalán?” Bayo wana kanan lalaki, “Gêtan mo di ya anak mo.”

²⁰Gintan lay anak kan Apo Jesus. Hêñ nahêlêk na hi Apo Jesus, hêñ hatoy hinumapat kanan anak, ay impatumba nay anak hêñ imbuwad-buwad hêñ ampaggalañ ya bêbêy. ²¹Kinotang ni Apo Jesus ya toa nan anak, “Nakano yan unan hinapatan?”

^k 9:12 Malakias 4:5, 6 ^l 9:12 Isaias 53:3-12 ^m 9:13 Mateo 17:13 ⁿ 9:13 Malakias 4:5, 6

Wanan toa na, “Paubat hēn nanawa ya pon. ²²No andawhongēn na ya, ay panay na yan an-itapon ha apoy, o an-ihugno ha lanēm ta patsēn na ya dayi. Noa, no main kan madyag, ay ingalwan mo kay dayi, hēn paalihēn mo ya kana.”

²³Bayo wani Apo Jesus, “Pata nahabi mo, no main akon madyag? Hilay ampaniwala kan Apo Namalyari ay makadyag hēn kaganawan!”

²⁴In-ikhaw nan inhabi hēn toa nan anak, ya wana, “Ampaniwala ko! Noa, no main pamagkulang ha paniwala ko, ay pahanan mina dayi!”

²⁵Hēn nahēlēk ni Apo Jesus ya kal-atan ya anlumatēng, ay namipaplag ya hēn hinumapat kanan anak, ya wana, “Hika ya namatēkk haka namaomēl kanan hata anak, ay mag-alíh ka kana, haka paan kay nan humapat kana!”

²⁶Hadyay angaw nan hinumapat kanan anak, intumba nay anak, haka hadyay pamibwad-bwad na kana, bayo inumalih yay na. Haka nanad hēn bangkay ya lawini nan anak. Kabay êndat lan kal-atan ya natsi yay na.

²⁷Noa, tinalan ni Apo Jesus ya gamēt na ta impairēng na ya, nirēng ya etaman ya anak.

²⁸Hēn nakahowēn hilan Apo Jesus ha bali ya ampaidyanan la, ay kinotang la yan tagahonol na no awta a la ya napaalíh ya hinumapat kanan anak. ²⁹Wana etaman ni Apo Jesus, “Ya êmbayroy narawak ya a angkahēlēk, ay a mapaalíh no alwan gawan ha pamanalangin.”

Inoman nan hinabi ni Apo Jesus ya patsēn ya
(Mateo 17:22-23; Lucas 9:43b-45)

³⁰Nag-alíh hilan Apo Jesus bayro, haka nagdann hila ha probinsyan Galilea, ta êmēn ayn makamwang no antoy andyanan la, ³¹ta antoroan nay tagahonol na, ya wana, “Hiko ya Taga-Langit, ya In-anak Tawo, ay i-upit ha kapatsi ko. Patsēn la ko, noa, ha ikatlon allo, ay mabiyay kon oman.” ³²Noa, a la naintindihan hēn tagahonol na ya habaytoy hinabi na. Malimo hila etaman hēn mangotáng kana.

No hino ya matag-ay ya tungkulan
(Mateo 18:1-5; Lucas 9:46-48)

³³Hēn nilumatēng hilay na ha balayan Capernaum, hēn atsi hilay na ha mihay bali, ay kinotang ni Apo Jesus hilay tagahonol na no hino ya pinihuhubakan la ha dann. ³⁴Noa, ayn kanla ya naghabi, gawan marēng êy hila ta pinihuhubakan la no hino kanla ya matag-ay ya tungkulan.

³⁵Nikno hi Apo Jesus, ta binaêg na hilay labinloway tagahonol na hēn dumani kana, ta wana kanla, “Hilay labay mag-in matag-ay, ay kailangan magpakaaypa hēn maghuyo kanlan ampangailangan hēn hawop.”

³⁶Binaêg nay mihay anak ya nanawa hēn mirēng ha arapan la ta tinakêh na ya, bayo wana kanlan tagahonol na, ³⁷“Hinoman ya ampaniwala

kangko, ya ampananggap kanlan maaypa ya nakêm nanad hata anak, hêñ gawan habaytoy paniwala la kangko, ay nanad hiko ya antanggapêñ la. Hila etaman ya ampananggap kangko, ay antanggapêñ la hi Apo Namalyari ya namiutoh kangko.”

Hilay a ampanalanghang kantamo, ay ampanawop kantamo
(Lucas 9:49-50)

³⁸ Wani Juan kan Apo Jesus, “Manoro, nahêlêk naêñ ya mihay lalaki ya ampanggamit hêñ langan mo ha pamaalih hêñ nangarawak ya a angkahêlêk. Binawal naêñ ya gawan alwa tamo yan kalamo.” ³⁹ Noa, wani Apo Jesus kana, “Paan yo yan bawalêñ, ta ayn manyag hêñ kapapaêpapah ha langan ko, bayo maghabin halanghang kangko. ⁴⁰ Hilay a ampanalanghang kantamo ay ampanawop kantamo. ⁴¹ Pakagilamêñ yo! Hilay mam-i kamoyu hêñ mihay baso hêñ lanêm, gawan hikaw ay ambaêgêñ tagahonol ko, ay taganán tumbahan hila etaman ni Apo Namalyari hêñ kangêran.”

Ya pangubatan hêñ pamanyag kasalanan
(Mateo 18:6-9; Lucas 17:1-2)

⁴² Inhundo ni Apo Jesus ya pamaghabi na, ya wana, “Hinoman ya pangubatan hêñ pamanyag kasalanan hêñ mihay maaypa ya nakêm hêñ nanad kanan hata nanaway anak ya ampaniwala kangko, ay mangêd pon kana, ya bayo ya mag-in pangubatan hêñ habayto, ay patsêñ ya hêñ êl-an yan mahlay ya bato ha lêey na, ta ilêmêh ha malalê ya lanêm. ⁴³ No gamêt mo ya anggamitêñ mon manyag kasalanan, ay mangêd ya potohêñ mo ya habayto. Ta mangêd pon ya milamo ka ha biyay ya ayn angga ha langit, hêñ ayn gamêt, kanan mipalako ka ha impiyerno ha apoy ya ayn angga, hêñ main gamêt. ⁴⁴ (Bayro ha apoy ya ayn angga, ay main owêl ya a angkamatsi ya mangna kanlan mipalako bayro.)^o ⁴⁵ No bitsih mo ya anggamitêñ mon manyag kasalanan, ay mangêd ya potohêñ mo ya habayto. Ta mangêd ya milamo ka ha biyay ya ayn angga ha langit, hêñ ayn bitsih, kanan mitapon ka ha impiyerno, hêñ main bitsih. ⁴⁶ (Bayro ay main owêl ya a angkamatsi ya mangna kanla.)^p ⁴⁷ No mata mo ya anggamitêñ mon manyag kasalanan, ay kêwêtêñ mo haka mon itapon. Ta mangêd ya milamo ka ha biyay ya ayn angga ha langit, hêñ ayn mata, kanan mitapon ka ha impiyerno, hêñ main mata. ⁴⁸ Bayro ha impiyerno ay main owêl ya a angkamatsi ya mangna kanla, haka ya apoy bayro ay a angkaparê.

⁴⁹ “Ya balang miha ay magdanas hêñ kairapan, ta êmêñ mag-in mangêd ya ugali la. Habayto ay nanad ha kêna ya dinyanan ahin, bayo imparann

^o 9:44 Habaytsi ay ayn ha kaatag ya Kahulatan Griego. ^p 9:46 Habaytsi ay ayn ha kaatag ya Kahulatan Griego.

ha apoy. ⁵⁰Mangêd ya ahin. Noa, no naalihan yay nan alat, ay ahinan maiorong ya alat na. Ihipên yoy pamanggamit hên ahin. Dapat panay kaw mag-in nanad ahin ya a naalihan, ta êmén main kapatékbékan ya pamilalamo yo.”

Intoro ni Apo Jesus ya tungkol ha pamihiyay hên miahawa
(Mateo 19:1-12; Lucas 16:18)

10 ¹Amêhêñ, ay immalíh hilan Apo Jesus bayro ha probinsyan Galilea, ta nagdann hilay na ha probinsyan Judea, hên nilumipay ha llog Jordan. Kal-atan ya nagtsipon hên nagpatoro kana. Tinoroan na hila etaman hên nanad ha panay nan andaygên.

²Main ungnoy Pariseo bayro ya napaidani kan Apo Jesus, ya labay mandakêp kana ha pamaghabi na. Kabay nangotang hila kana, ya wanla, “Malyari ha mihay lalaki hên ihiyay nay ahawa na, hinoman ya pagbad-an?” ³Nangotang hi Apo Jesus, “Hinoy utoh ni apo Moises ya tungkol bayro?” ⁴Wanla etaman, “Pinaulayan ni apo Moises ya lalaki hên mamihiyay hên ahawa la no main hilay nan kahulatan ya an-ihiyay lay ahawa la.” ⁵Wanay na êt ni Apo Jesus, “Gawan ha kakdêyan ulo yo, ha a yo labay humonol ha kalabayan ni Apo Namalyari, ay kabay nanulat hi apo Moises hên habaytoy utoh. ⁶Noa, hên haton lagi, hên dinyag ni Apo Namalyari ya luta, ay nanyag yan lalaki, haka nanyag ya êt hên babayi.^q ⁷Kabay lakwanan nan lalaki ya toa na, ta milamo hilay nay miahawa. ⁸Hilay miahawa ay mag-in mimiha,^r kabay alwa hilay nan lowa, ta mimiha hila tana. ⁹Ya pinilamo ni Apo Namalyari, ay dapat a pihiyayêñ.”

¹⁰Hêñ nilumatêng hilan Apo Jesus ha ampaidyanan la, ay hilay tagahonol na etaman ya nangotang kana, no hinoy labay habiêñ hên habaytoy hinabi na. ¹¹Kabay hinabi ni Apo Jesus, ya wana, “Ya lalaki ya mamihiyay hên ahawa na, bayo mag-ahawa yan kaatag, ay nanyag kasalanan ha una nan ahawa gawan namabayi ya. ¹²Êmbayro êt ya babayi ya nakihiyay ha ahawa na, bayo makiahawa ha kaatag ya lalaki, ay nanyag kasalanan gawan nakilalaki ya.”

Inhalangin ni Apo Jesus ya nanganaway anak
(Mateo 19:13-15; Lucas 18:15-17)

¹³Nanganaway anak man, ay anggêtan kan Apo Jesus, ta ihalangin na hila hên ipalunto nay gamêt na ha ulo la. Hêñ nahêlêk lan tagahonol ni Apo Jesus ya hata manianak-anak, ay binawal lay ampantan kanla.

¹⁴Noa, hêñ napansin ni Apo Jesus, ya angkalyari, ay hinuluk nay tagahonol na, ya wana, “Paulayan yo hilay anak hên paidani kangko. Paan yo hilan bawalêñ. Ta hilay maaypa ya nakêm ya nanad kanla, ay

^q 10:6 Genesis 1:27 ^r 10:8 Genesis 2:24

hila ya ilamo ha pamanlokop ni Apo Namalyari. ¹⁵ Pakagilamên yoy hatsi. Hilay a manoto ha paniwala lan nanaway anak ha pagpalokop la kan Apo Namalyari, ay a makapakilamo ha pamanlokop na.” ¹⁶ Tinakêh nay manianak-anak, bayo impalunto nay gamêt na ha ulo la, ta inhalangin na hila.

Ya mihay mabandi, ya Israelita, ya nangotang no hino ya dapat nan daygên ta êmên ya madyanan biyay ya ayn angga
(Mateo 19:16-30; Lucas 18:18-30)

¹⁷Hêñ paalíh hilan Apo Jesus, ay main mihay lalaki ya nuwayun dinumani hêñ nandoko ha arapan na hêñ nangotang, “Mangêd ya Mánoro, hino ya dapat kon daygên, ta êmên ako madyanan hêñ biyay ya ayn angga?” ¹⁸Wani Apo Jesus kana, “Pata binaêg mo kon mangêd? Hi Apo Namalyarin bêngat ya mangêd. ¹⁹Muwang moy Kautuhan ni Apo Namalyari, ‘Paan mamatsin kaparehon tawo. Paan mamabayi. Paan makilalaki. Paan manakaw. Paan manistigos ha alwan pêtêg. Paan manloko. Galangêñ moy toa mo.’” ²⁰Bayo wanana lalaki, “Mánoro, anhonolêñ kina ya habayto ngan, paubat hêñ nanawa ko pon.” ²¹Hêñ nagilam ni Apo Jesus ya hinabi na, ay hinlêk na ya lalaki hêñ main pamanlugud, ta wana, “Miha pon ya kailangan mon daygên. Iubuh mon ihaliw ya pibandian mo, bayo idin moy habaytoy naablian kanlan mangairap, ta madyanan kan mantêg hêñ pibandian ha langit. Pangayari mon madyag ya habayto, ay mag-orong ka di, ta humonol ka kangko.” ²²Noa, hêñ nagilam nay hinabi ni Apo Jesus, ay ayn yay nan higla haka nammita ya hêñ ampaglungkot, ta miha yay mabandi.

²³Hinlêk ni Apo Jesus hilay tagahonol na, bayo wana kanla, “Alwan nataluh hêñ makapakilamo ha pamanlokop ni Apo Namalyari ya hilay mabandi!” ²⁴Angkalipang ya ihip lan tagahonol na ha hinabi na. Noa, inoman nan hinabi ni Apo Jesus, “Hikaw ya nanad anak ko, alwan nataluh hêñ makapakilamo ha pamanlokop ni Apo Namalyari! ²⁵Nataluh hêñ magdann ha lubot karayêm ya mihay kamelyo, kanan makapakilamo ha pamanlokop ni Apo Namalyari ya mihay mabandi.” ²⁶Angkalipang ya ihip lan tagahonol na ha hinabi na, kabay nipakotang hila, “Hino awud ya miligtas, hêñ makapakilamo ha pamanlokop ni Apo Namalyari?” ²⁷Pinakahêlêk hila ni Apo Jesus, bayo wana, “Ya a madyag hêñ tawo, ay madyag ni Apo Namalyari.”

²⁸Amêhêñ, wani Pedro, “Ay-êmên kay, ya tagahonol mo? Imbalag naén ya kaganawan, ta êmên kay humonol kamo.” ²⁹Wana etaman ni Apo Jesus, “Hilay nangibalag bali la, kapotoh pohêl la, toa la, anak la, haka luta la, gawan ha pamanhumonol la kangko, hêñ maypamwang hêñ Mangangêd ya Habi ya tungkol ha kaligtasan, ³⁰ay matumbahan hêñ katamagatoh kanan imbalag la. Kaban atsi hila pon di ha luta, ay

matumbahan hilan bali, kapotoh pohêl, indo, anak haka luta. Pairapan hilan kaatag, noa, lano, ay madyanan hila hên biyay ya ayn angga.

³¹Noa, mal-at kanlan matag-ay ya tungkulon ha hêlek hên kapareho la, ay alwan matag-ay ha hêlek ni Apo Namalyari, haka mal-at kanlan maaypa ya tungkulon ha hêlek hên kapareho la, ay matag-ay ha hêlek ni Apo Namalyari.”

**Ikatlon pangungkat ni Apo Jesus, ya patsên ya
(Mateo 20:17-19; Lucas 18:31-34)**

³²Hêñ atsi hila ha dann, hilan Apo Jesus, hêñ palako ha balayan Jerusalem, ay angkauna hi Apo Jesus ha pammita la. Ampag-êpapah hilay tagahonol na, haka hilay kaatag ya ampakihonol kanla, ay angkalimwan, gawan muwang lay main labay mamatsi kan Apo Jesus bayro ha Jerusalem. Amêhêñ, impapawa nay labinloway tagahonol na, ta impamwang na kanlan bêngat ya malyari kana, ³³ya wana, “Pakagilamêñ yo! Anlumakat kitamo ha Jerusalem ta hiko, ya Taga-Langit, ya In-anak Tawo ay i-upit bayro ha gamêt lan máñoron Kautuhan ni apo Moises, haka kanlan ampamaala kanlan pari. Habién lan habayto ya hikoy dapat patsên, bayo idin la ko kanlan alwan Israelita. ³⁴Musmusêñ, dul-an, haka pagpapatokêñ la ko, bayo patsên la ko. Noa, ha ikatlon allo, ay mabiyay kon oman!”

**Labay ni Santiago haka ni Juan, ya lowa kanlan tagahonol ni Apo Jesus, ya paiknoêñ hila ha dani na
(Mateo 20:20-28)**

³⁵Dinumani hêñ nangotang kan Apo Jesus ya loway anak ni Zebedeo, ya hi Santiago haka hi Juan, ya wanla, “Manoro, main kay dayin pakihabi kamo.” ³⁶Wani Apo Jesus etaman, “Hinoy labay yo kangko?” ³⁷Wanla etaman kana, “Labay naêñ, ya lano ha pamanlokop mo, ay paiknoêñ mo kay ha dani mo, ya miha ha dapit panabtab, haka miha êt ha dapit uki.” ³⁸Wani Apo Jesus kanla, “A yo angkaintindihan ya pamagdusa ya maranasan yo, no mahonol ya kalabayan yo. Matêh yoy pamagdusa ya danasêñ ko? Taganán nakal-an kaw hêñ matsi hêñ nanad kangko?” ³⁹Wanla etaman kana, “Awo. Nakal-an kay.” Kabay wani Apo Jesus kanla, “Madanasan yoy pamagdusa ya danasêñ ko, haka matsi kaw hêñ nanad kangko. ⁴⁰Noa, ayn akon karapatan hêñ maghabi no hinoy mikno ha dani ko, ta tinalagá nay na ni Apo Namalyari no hinoy mikno ha dani ko.”

⁴¹Hêñ nagilam lan mapoy kaatag ya tagahonol na, ya labay ni Santiago haka ni Juan, ay hinumuluk hila. ⁴²Kabay pinarani na hila ni Apo Jesus, ta wana kanla, “Muwang yo ya hilay manungkulon lan a ampagpalokop kan Apo Namalyari, ay andaygêñ lan ipoh ya angkalokopan la, haka

an-iatay la hilan manyag kalabayan la. ⁴³Noa, dapat alwan êmbayro ya daygên yo. No labay yon mag-in matag-ay ya tungkulan, ay dapat yon huyuén ya kapareho yon tawo. ⁴⁴Ya labay mag-in pinakamatag-ay ya tungkulan, ay dapat mag-in nanad ipoh hêñ kalamo na. ⁴⁵Ta hiko man ya Taga-Langit, ya In-anak Tawo, ay atsi bayri amêhêñ ha luta, alwan para paghuyuan, noa, para maghuyo angga ha idin koy biyay ko, ha pangakbus hêñ kal-atan.”

Namamukat hi Apo Jesus hêñ mihay buwag ya hi Bartimeo

(Mateo 20:29-34; Lucas 18:35-43)

⁴⁶Amêhêñ, nilumatêng hilan Apo Jesus ha balayan Jerico. Hêñ paalfh hila bayro ha balayan, hêñ kalamo hilay kal-atan, ay main buwag ya ampikno ha danin dann, ya ampakikwan pera. Ya langan na ay Bartimeo, ya anak ni Timeo. ⁴⁷Hêñ nagilam nay ampanlibah hi Apo Jesus ya taga-balayan Nazaret, ay nan-angaw ya, ya wana, “Apo Jesus, ya kaapo-apoan ni Arin David, ingalwan mo ko dayi!” ⁴⁸Binawal yan maglabak hêñ hatoy kal-atan ya ampakihonol kan Apo Jesus, noa, impakakhaw nan in-angaw, “Kaapo-apoan ni Arin David, ingalwan mo ko dayi!” ⁴⁹Hêñ nagilam ni Apo Jesus ya angaw na, tinunggêñ ya, ta main yan in-utoh, hêñ akayêñ lay buwag hêñ ilako kana. Hinabi la kanan buwag, “Pakhawêñ moy nakêm mo! Mirêng ka ta impaakay na ka kana.” ⁵⁰Tampol yan nirêng. Imbalag nay pangkêbêl na, ta nagpaakay ya ha dani ni Apo Jesus. ⁵¹Nangotang hi Apo Jesus kana, “Hinoy labay mon daygên ko kamo?” Amêhêñ, wanana buwag, “Panginoon, labay ko dayin makahêlêk.” ⁵²Kabay hinabi ni Apo Jesus kana, “Makahêlêk ka, gawan ha paniwala mo kangko. Malyari kay nan mita.” Tambêng ya etaman nakahêlêk, kabay nakihonol yay na kan Apo Jesus.

**Mal-at ya ampapguri kan Apo Jesus hêñ ampandaraho yay na ha
balayan Jerusalem**

(Mateo 21:1-11; Lucas 19:28-40; Juan 12:12-19)

11 ¹Nahêñ narani hilan Apo Jesus ha Jerusalem, ha talindah hêñ Tawtgug Olibo, hêñ angkadungawan lay balayan Betfage, haka baryon Betania, ay impauna ni Apo Jesus ya lowa kanlan tagahonol na, ²ta wana kanla, “Muna kaw ha balayan ha unaan tamo. Panhumwêñ yo ha balayan, ay tampol yon mahêlêk ya mihay biseron asno, ya nakah-êl, ya a pon nahakyen. Okalêñ yoy habayto, ta gêtan yo di. ³No main mangotâng kamoyu no awta an-okalêñ yoy habayto, ay habiêñ yo, ‘Kailangan yan Panginoon haka tampol nan ipaorong di.’” ⁴Kabay nammita hilay nay loway in-utoh na. Haka natapol la etaman ya biseron asno ya nakah-êl ha mihay ilwangan ha danin dann. Kaban an-okalêñ la ya, ⁵ay main ungnoy nangotang, “Pata an-okalêñ yoy habain ya

bisero?"⁶ Impamwang la ya hinabi ni Apo Jesus kanla. Kabay pinaulayan hila etaman. ⁷In-akay lay nay bisero kan Apo Jesus, haka la inamakan pangkêbel la, bayo himmakay hi Apo Jesus. ⁸Inhundo lan Apo Jesus ya pammita lan palakon Jerusalem. Ha pandanan lan Apo Jesus, ay nami-amak hilay atsi bayro hên pangkêbel la o bulong, gawan ha panggalang la kana. ⁹Hilay atsi ha unaan ni Apo Jesus haka hilay anhumonol kana ay nipan-angaw, "Hosanna! Iningalwan ya habaytsi ya in-utoh ni Apo Namalyari! ¹⁰Iningalwan ya anlumatêng ya pamamaala nan kaapo-apoan ni Arin David! Hosanna! Purién hi Apo Namalyari!"

¹¹Hênilumatêng hilan Apo Jesus ha Jerusalem, ay nagpakha ya ha Templo. Inubuh nan hinlêk ya angkalyari bayro. Gawan anyumabi yana, ay immawah ya ta nag-orong ya ha baryon Betania, hên kalamo nay labinloway tagahonol na.

Inhumpa ni Apo Jesus ya mihay poon igos
(Mateo 21:18-19)

¹²Pangamaranon hên mag-orong hilan Apo Jesus ha balayan Jerusalem hên ubat ha Betania, ay nilonoh hi Apo Jesus. ¹³Hênaipatanêh nay mihay poon igos ya nagbulong, ay dinanian nan hinlêk no main tagêy. Noa, bulong bêngat ya nalatngan na gawan alwa pon panaon tagêy. ¹⁴Kabay wana kanan kayo, "Angga-angga, ay a kay na managêy oman!" Nagilam lan tagahonol na ya hinabi na.

Namitaboy hi Apo Jesus hên ampipagtinda ha Templo
(Mateo 21:12-17; Lucas 19:45-48; Juan 2:13-22)

¹⁵Hênilumatêng hilan Apo Jesus ha Jerusalem, ay nagpakha ya ha Templo. Intaboy na hilay ampipagtinda haka ampipanaliw bayro. In-iitwag nay lamisaan lan mâmihagili hên pera, haka in-iitwag na êt ya iknoan lan mâmihaliw hên pati-pati ya gamitêh átang. ¹⁶Binawal na hilay ampangalga, hên magdann bayro ha Templo. ¹⁷Haka na hila tinoroan ya kal-atan, ya wana kanla, "Nakahulat ha habi ni Apo Namalyari, ya wanana hulat, 'Ya bali ko, ay ambaégen balin panalanganin para ha balang bansa.'^s Noa, dinyag yo yan legal^t ya panlokoan yon kapareho yo!"

¹⁸Hênnagilam lan mánoron Kautuhan ni apo Moises, haka hilay ampamaala kanlan pari, ya tungkol ha hinabi haka dinyag ni Apo Jesus, ay pinihabian la no hinoy maibara la kana, ta êmén la ya mapatsi. Angkalimo hila kana, gawan ha kal-atan ya ampag-épapah ha pamanorona. ¹⁹Hênenyumabi yana, ay nag-alíh hilan Apo Jesus bayro ha balayan Jerusalem.

^s 11:17 Isaias 56:7 ^t 11:17 Jeremias 7:11

Ya toro ya makwa ha nayangoy kayon igos ya inhumpa
(Mateo 21:20-22)

²⁰Pangamaranon, hēn nagdann hilan Apo Jesus bayro ha inhumpay poon kayon igos, ay nayangoy na ya habayto. ²¹Napanêmtêman ni Pedro ya inhumpa ya kayo, kabay wana, “Manoro, hēlkēn mo! Nayangoy nay inhumpa moy kayo!” ²²Wani Apo Jesus, “Maniwala kaw kan Apo Namalyari. ²³Pakagilamēn yo, no main mamiutoh kanan hata tawtgug hēn mitapon ya ha dagat, no ampaniwala ya, hēn ayn pamikakono, ay itapon nay na ni Apo Namalyari ha dagat. ²⁴Kabay, pakagilamēn yo, no ampaniwala kaw, ay matanggap yoy hinoman ya pakikwaan yo ha panalangin. ²⁵Haka bayo kaw manalangin, ay patawarēn yo pon hilay nakadyag kasalanan kamoyu, ta êmēn na kaw etaman patawarēn ni Apo Namalyari, ya Tatang tamo ha langit. ²⁶Noa, ta no a yon patawarēn ya nakadyag kasalanan kamoyu, ay a na kaw patawarēn ni Apo Namalyari, ya Tatang tamo ha langit.”

No antoy ubatan hēn tungkulan ni Apo Jesus
(Mateo 21:23-27; Lucas 20:1-8)

²⁷Hēn atsi hilay nan oman ha Jerusalem hilan Apo Jesus, hēn ampibabitita ya ha Templo, ay dinumani kana hilay mánoron Kautuhan ni apo Moises, hilay toa ya nag tungkulan ha bansa, haka hilay ampamaala kanlan pari. ²⁸Hinabi la kana, “Habién mo kannâen no hinoy tungkulan mo hēn manyag hēn pandaygēn mo. Habién mo êt no hinoy nam-i kamō hēn habain ya tungkulan.” ²⁹Kabay wani Apo Jesus, “Main ako pon hēn kotangén kamoyu. No pakibatan yo ko, ay habién ko kamoyu no hinoy nam-i kangko hēn tungkulan hēn manyag hēn pandaygēn ko. ³⁰Hinoy nam-i hēn tungkulan kan Juan Bautista hēn mamawtismo? Hi Apo Namalyari o tawo?” ³¹Kabay pinihahabian la, ya wanla, “Hinoy habién tamo? No habién tamo ya ‘Ubat kan Apo Namalyari ya tungkulan ni Juan Bautista,’ ay habién na bayto, ‘Pata a yo yan pinaniwal-an?’ ³²Noa, no habién tamo ya ‘Ubat ha tawo,’ ay hino kaya ya daygēn lan kal-atan kantamo, ta ha ihip la, hi Juan ay mihay propeta ni Apo Namalyari.” ³³Kabay hinabi la kan Apo Jesus, ya wanla, “A naén muwang no antoy ubatan tungkulan ni Juan Bautista.” Bayo wani Apo Jesus, “No êmbayro awud, ay a ko etaman habién kamoyu no antoy ubatan tungkulan ko.”

**In-alimbawa ni Apo Jesus ya sarili na ha anak ya anlugurēn ya pinatsi,
 haka ha bato ya intapon**
(Mateo 21:33-46; Lucas 20:9-19)

12 ¹Amêhēn, nangalimbawa yay na êt hi Apo Jesus, ya wana kanlan ampanggilam, “Minghan main lalaki ya nag luta ya tinamnan

nan ubas. Bayo binakoran nay habayto. Nangali yan pangiunaban hêñ ubas, haka ya êt namairêng hêñ tawer ya pagbantayan. Impatsiwala na ha kaatag ya ubasan na, ta maglaêh ya ha kaatag ya bansa.² Hêñ pamutsi hêñ habaytoy ubas, ay in-utoh nay mihay ipoh na, hêñ kowêñ ya atag na kanlan paypaniwal-an ubasan na.³ Noa, dinakêp haka tinumbuk lay ipoh na, bayo impaorong la ya, hêñ ayn anggêtan.⁴ Kabay in-utoh nay na êt ya kaatag ya ipoh na, noa, pinatok lay ulo na, impakarêng-êy la ya, bayo impaorong la ya hêñ ayn anggêtan.⁵ Nahêñ in-utoh nay na êt ya ikatlon ipoh na, ay pinatsi la ya. Mal-at êt ya ipoh ya in-utoh na. Ya kaatag kanla ay tinumbuk la, haka ya kaatag, ay pinatsi la.⁶ Hêñ ayn yay nan ipoh ya maiutoh, ya nag ubasan, ay in-utoh nay anlugarûñ nan anak nay lalaki, ta wana, ‘Siguradon igalang lay anak ko.’⁷ Noa, hêñ nahêlêk lan paypaniwal-an ubasan ya anak nan nag ubasan, ay nihahabi hila, ya wanla, ‘Hatsi ya paypamanaan na hêñ ubasan. Patsêñ tamo ya, ta êmêñ mapagbandi tamo ya hata ubasan na.’⁸ Kabay dinakêp la ya, haka pinatsi, bayo inhamwag lay bangkay na ha luwal hêñ ubasan.”

⁹ Amêhêñ, kinotang ni Apo Jesus, hilay ampamaala ha Templo, ya wana, “Hino kaya ya daygêñ hêñ nag ubasan kanlan paypaniwal-an nan ubasan? Siguradon lakwêñ nay paypaniwal-an nan ubasan, ta patsêñ na hila, bayo ipatsiwala nay ubasan na ha kaatag.”¹⁰ Wana êt ni Apo Jesus kanlan ampamaala ha Templo, “Yarin a yo êt nabaha ya habaytsi ya nakahulat ha Kahulatan ya impahulat ni Apo Namalyari?

‘Ya bato ya intapon lan manyag bali,
ay nag-in pinakamaalagáy bato
ta êmêñ mag-in napah-êy ya bali.

¹¹ Dinyag ni Apo Namalyari ya habayto ya kapapaêpapah.’ ”^u

¹² Naintindihan lan ampamaala ha Templo, ya hilay in-alimbawa di ha manyag bali, haka ha nangarawak ya paypaniwal-an ubasan, kabay labay la yan dakpêñ, noa, malimo hila ha kal-atan. Kabay nammita hilay na.

Ya pamayad hêñ buwih (Mateo 22:15-22; Lucas 20:20-26)

¹³ Bayo namiutoh hilan ungnoy Pariseo haka ungnoy kagampi ni Herodes Antipas, ya waringan main hilan labay mamwangan kan Apo Jesus. Noa, labay la yan madakêp ha pamaghabi na.¹⁴ Hêñ nilumatêng hila kan Apo Jesus, ay hinabi la, “Mánoro, muwang naén ya kaptêgan ya panhabîen mo haka panoro mo. An-itoro moy kalabayan ni Apo Namalyari, ha hinoman ya ampanggilam, gawan alwa kan mapamili, ta pantag ya panlêk mo ha balang miha. Kabay main kay hêñ labay mamwangan kamo. Ayon ha Kautuhan ni apo Moises, ay malyarin mam-in buwih kanan Emperador o ahê?”¹⁵ Noa,

^u 12:11 Awit 118:22-23

muwang ni Apo Jesus ya pagbabara la, kabay hinabi na kanla, ya wana, “Pata labay yo kon dakpên ha pamaghabi ko! Ipahlêk yo kangko ya mihay sintimos hên pilak.”¹⁶ Namiawah hilan habayto, bayo kinotang na hila. “Hinoy nag lupa hên angkakit yo bahê? Hinoy nag langan ya nakahulat bahê?” Hinabi la etaman, “Kanan Emperador.”¹⁷ Kabay wani Apo Jesus, “No êmbayro awud, ay idin yo kanan Emperador ya kana, haka idin yo kan Apo Namalyari ya kan Apo Namalyari.” Hêñ nagilam lay hinabi na, ay nag-êpapah hila.

Ya kotang ya tungkol ha pangabiyay oman

(Mateo 22:23-33; Lucas 20:27-40)

¹⁸ Amêhêñ, ay main ungno ha mihay pangkat lan Israelita ya ambaêgêñ Saduseo ya dinumani kan Apo Jesus. Hilay Saduseo ay a ampaniwala ha pangabiyay oman. Haka hinabi la kan Apo Jesus, ya wanla,¹⁹ “Mánoro, nanulat ya hi apo Moises ha Kautuhan hên para kantamo, ya wanhan hulat, ‘No main mitaahawa, ta natsi ya lalaki hên a hila nagkaanak, ay dapat ya kahonol nan natsi, ay ipaahawa kanan bawo. No magkaanak hila, ay habaytoy anak, ay itad anak na hên natsi.’²⁰ Minghan, ay main pitoy mikakahonol ya lalaki. Nakapag-ahawa ya punganay, noa, natsi ya hên a nagkaanak.²¹ Bayo pinag-ahawa nan humonol ha punganay ya hata bawo, noa, natsi ya etaman ya humonol ha punganay hên a nagkaanak. Êmbayro êt ya nalyari ha ikatlon kahonol.²² Balang miha kanlan pitoy mikakahonol ay nakapag-ahawa hên hata babayi, noa, naubuh hilan natsi hên a nagkaanak. Bayo natsi ya êt ya hata bawo.²³ Amêhêñ, ha allon pangoman mabiyay, hinoy nay taganán mag-in ahawa nan hata babayi, ta balang miha kanlan habaytoy pitoy mikakahonol ay nag-in ahawa na?”

²⁴ Kabay wani Apo Jesus kanlan Saduseo, “Mali ya paniwala yo, ya a biyayêñ oman ya natsi, gawan a yo angkaintindihan ya Kahulatan ya impahulat ni Apo Namalyari haka a yo angkaintindihan ya kapangyarihan na!²⁵ Ha pangoman biyayêñ hilay natsi, ay ayn nanan pamag-ahawa, ta manoto hila kanlan anghel ha langit ya a ampag-ahawa.²⁶ Ya hulat man ni apo Moises ay ampamaptêg ya biyayêñ oman hilay natsi, ta bayro ha hulat na, ya tungkol ha maaypa ya kayoy andungkêt, mabáha tamo ya hinabi ni Apo Namalyari, ‘Hikoy Diyos ni Abraham, Diyos ni Isaac, haka Diyos ni Jacob.’^{v 27} Habaytoy labay habiêñ ya hiyay Diyos lan angkabiyay, ta balang miha ya natsi, ay angkabiyay ha hêlêk na. Mali ya paniwala yo, ya a biyayêñ oman ya natsi.”

Ya pinakamaalagá ya utoh ni Apo Namalyari

(Mateo 22:34-40; Lucas 10:25-28)

²⁸ Main mánoron Kautuhan ni apo Moises ya nakagilam hên pamakipagpalinawan la. Hêñ napansin na, ya mangêd awud, ya hinabi ni

^{v 12:26} Exodus 3:6

Apo Jesus, ay nangotang ya, “Mánoro, hinoy pinakamaalagá ha utoh ni Apo Namalyari?” ²⁹Hinabi ni Apo Jesus, “Ya pinakamaalagá utoh ni Apo Namalyari, ay ‘Manggilam kaw ya Israelita. Mimihay Panginoon tamo, yabay ya hi Apo Namalyari, ayn nanan kaatag. ³⁰Lugurên mo hi Apo Namalyari, ya Panginoon hén boon nakém, boon ihip, haka boon hékaw.’ ³¹Ya ikalwa ay, ‘Lugurên moy kapareho mo hén nanad pamanlugud mo ha lawini mo.’ Ayn kaatag ya utoh ya maalagá kanlan habaytoy lowa.” ³²Wanan mánoron Kautuhan ni apo Moises, “Taganán pêtêg ya hinabi mo ya mimihay Panginoon tamo, yabay ya hi Apo Namalyari, ayn nanan kaatag. ³³Haka muwang ko ya maalagá ya lugurên tamo ya hén boon nakém, boon ihip, haka boon hékaw. Dapat tamo etaman hén lugurên ya kapareho tamo hén nanad ha pamanlugud tamo ha lawini tamo. Maalagá ya habayto kanan hinon imparaya o in-átang kana.” ³⁴Nadambi ni Apo Jesus ya main kagalinan ya hinabi nan mánoron Kautuhan ni apo Moises, kabay wana kana, “Marani ka ha pamanlokop ni Apo Namalyari, ta pérâd tana ay palokop ka kana.” Marêng-êy hilay na hén mangotáng pon kan Apo Jesus, hilay labay hén mandakêp kana ha pamaghabi na.

**Hi Cristo, ya Mesias, ay alwan bêngat kaapo-apoan ni Arin David, noa,
hiyay Panginoon ni Arin David etaman
(Mateo 22:41-46; Lucas 20:41-44)**

³⁵Kaban ampanoro ya hi Apo Jesus ha Templo, ay nangotang ya, “Ay-êmén lan mahabi lan mánoron Kautuhan, ya Mesias, ya Cristo, ya impangakon Mámilitgas ya pinili ni Apo Namalyari hén mamaala ay kaapo-apoan bat ni Arin David? ³⁶Mismon hi Arin David, ya ninuno tamo, ay namihulat ha Kahulatan ha kapangyarihan nan Espiritu ni Apo Namalyari, hén tungkol ha Mesias, ya Cristo, ya wana,

‘Hinabi ni Apo Namalyari ha Panginoon ko,
“Mikno ka ha dapit panabtab ko hén mamaala hén kalamo ko,
angga ha mahambut ko hilay kapatsi mo,
ta idin ko hila ha aypan kapangyarihan mo.”’ ^w

³⁷Wana êt ni Apo Jesus, “Hén hato, ay hi Arin David ya namaég hén ‘Panginoon ko’ ha Mesias, ya Cristo, ya impangakon Mámilitgas ya pinili ni Apo Namalyari hén mamaala. Kabay muwang tamo, ya hiyay Panginoon haka kaapo-apoan ni Arin David.” Hadyay kahiglaan lan kal-atan hén manggilam hén toro na.

**Kaillag ha toro lan mánoron Kautuhan ni apo Moises
(Mateo 23:1-36; Lucas 20:45-47)**

³⁸Inhundo ni Apo Jesus ya panoro na, ya wana, “Kaillag kaw ha toro lan mánoron Kautuhan ni apo Moises. Labay-labay la hén mibita-bitá

^w 12:36 Awit 110:1

hêñ nakatakop hêñ makarang ya takop, ta êmêñ ipamwang ya matagay ya tungkulan la. Labay la êt hêñ galangêñ, haka dayêwêñ hila hêñ kal-atan ha balayan. ³⁹ Ya kaatag pon ya andaygêñ la ta êmêñ ipamwang ya matag-ay ya tungkulan la, ay ampiîen lay pinakamangêd ya iknoan ha sinagoga haka ha kaluto. ⁴⁰ Anlokoêñ la êt ya bawo ya babayi, ta êmêñ la makwa ya pibandian la, bayo magma-mangêd hilan ikarang ya panalangin la ha arapan hêñ kal-atan. Kabay hadyay pamarusa kanla lano.”

Ya alay hêñ mihay bawo ya babayi

(Lucas 21:1-4)

⁴¹ Kaban atsi ya pon ha Templo hi Apo Jesus, hêñ ampikno ha êtêb hêñ pamyanan alay, ay anhêlkêñ nay kal-atan ya ampam-in alay la ha pamyanan alay. Mal-at ya mabandi ya nam-in kal-atan bandi. ⁴² Noa, ya mihay bawo ya babayi, ya mairap, ay nam-in lo-loway sintimos ha pamyanan alay. ⁴³ Kabay wani Apo Jesus kanlan tagahonol na, “Pakagilamêñ yo, hata bawo ay nam-in mal-at kanan indin lan kal-atan mabandi. ⁴⁴ Ta hilay kaatag ay nam-in a la pon kailangan, noa, hata bawo, ay in-ubuh nan indin ya panaliw nan maêkan na.”

Inungkat ni Apo Jesus ya pamanira hêñ Templo

(Mateo 24:1-2; Lucas 21:5-6)

13 ¹Hêñ mag-awah hilan Apo Jesus ha Templo, ay wanana miha kanlan tagahonol na, “Mánoro, hêlkêñ mo ya pangahlayan bato ya pinaglolog la ha Templo! Hadyay kahampatan na!” ² Amêhêñ, hinabi ni Apo Jesus, ya wana, “Lumatêng lanoy allo, ay manga-aagwat ngan ya hata bato ya pinaglolog ya angkahêlêk yo.”

Ya hadyay pamairap ya lumatêng

(Mateo 24:3-14; Lucas 21:7-19)

³Hêñ atsi hilan Apo Jesus ha Tawtgug Olibo, hêñ nakaikno ya ha êtêb Templo, ay napaidani kana hi Pedro, hi Santiago, hi Juan, haka hi Andres, hêñ hilan bêngat. ⁴ Amêhêñ, nangotang hila kana, “Habiêñ mo kannaêñ no makanon malyari ya habayto, haka no ay-êmêñ naêñ mamwangan no maranin malyari ya habayto.”

⁵Kabay wani Apo Jesus, “Kaillag kaw, ta êmêñ a kaw maloko, ⁶ta mal-at ya maghabin êmêñ di, ‘Hiko ya Mesias, ya Cristo, ya impangakon Mâmiligtas ya pinili ni Apo Namalyari hêñ mamaala.’ Gawan bayro, ay mal-at ya maloko la. ⁷Paan kaw malimo ha magilaman yoy tungkol ha manigulo-gulo haka pa-tsian, ta habayto ay kailangan lumatêng pon, noa, a pon tambêng lumatêng ya anggaan hêñ luta. ⁸Milalaban hilay bansa haka hilay angkalokopan hêñ mihay bansa ay milalaban ha

kabansa la. Lumatêng ya mangakhaw ya layon ha ay-iri man ya legal. Lumatêng êt ya hadyay lonoh. Noa, habayto ay umpisan bêngat hên hadyay kairapan, hên nanad ha umpisan pan-umilab hên ampanganak.

⁹“Dapat kaillag kaw, ta gêtan la kaw kanlan toa ya nag tungkulun ha hinon sinagoga, kotangên la kaw haka pagpapatokên la kaw ha sinagoga. Gawan ha paniwala yo kangko, ay gêtan kaw kanlan ari haka gobernador. Ha êmbayro ay maipamwang yo kanla ya Mangêd ya Habi tungkol kangko. ¹⁰Yabay ya kailangan hên ipamwang ha balang bansa bayo lumatêng ya kaanggaan hên hata luta. ¹¹Uston iarap la kaw kanlan manungkulun, ta kotangên la kaw, paan kaw manyagah no hinoy habiêñ yo, ta ya Espiritu ni Apo Namalyari, ay mamaihip kamoyu no hinoy habiêñ yo. ¹²Main kapotoh pohêl, haka toa, ya may-upit hên kamag-anak la. Main maának ya manalanghang ha toa la hên angga ha ipapatsi la hila. ¹³Kahêmêkan kaw hên kal-atan, gawan ha paniwala yo kangko. Noa, no maihundo yoy paniwala yo kangko, angga ha anggaan biyay yo, agyan ampagdanas kaw hên hadyay pamairap, ay madyanan kaw hên biyay ya ayn angga.”

Inungkat ni Apo Jesus ya pamanira ha balayan Jerusalem
(Mateo 24:15-28; Lucas 21:20-24)

¹⁴Inhundo ni Apo Jesus ya pamaghabi na, ya wana, “No mahêlêk yoy nay kapaparêng-êy ya hadyay karawakan ya malyari ha Templo ni Apo Namalyari, ay ha allon habayto, ay kailangan muwayun magtago ha babo, ya hilay taga-probinsyan Judea.” Hikaw ya ampamaha ay pakaintindiêñ yoy habaytsi! ¹⁵“Habaytoy allo, no main atsi ha bubungan bali la, ay dapat tampol hilan tumao hên muwayun lumakat ha babo! Paan hilay nan mangwan pibandian la ha lalêñ bali la! ¹⁶Paan hilay nan muli ya atsi ha panamnan hên mangwan sambra la! ¹⁷Kanan habayto, ay kaingalo hilay nabuktot haka hilay ampamahoho. ¹⁸Ihalangin yo, ya a dayi malyari ha panaon hên kêbêl, ya habaytoy pammuwayu yo hên magtago. ¹⁹Ta di ha luta ay maranasan ya hadyay kairapan, ya ayn kapantag paubat hên dinyag ni Apo Namalyari ya hata luta, angga amêhêñ. Haka ahina maranasan oman ya êmbayroy kairapan. ²⁰No mabuyot ya habaytoy kairapan, ay ayn nanan mabiyay di ha luta, noa, gawan bat ha ikakangêd lan pinili na hên mag-in kana, ay tinalagá ni Apo Namalyari hên paipêkêñ ya habaytoy panaon.

²¹“Kanan habaytoy panaon, no main maghabin, ‘Atsi ya bayri ya Mesias, ya Cristo, ya Mámiligas, o atsi ya bayro,’ ay paan kaw maniwala kanla. ²²Ta main magbabara hên hila ay Cristo, haka main êt kaatag ya magbabara hên hila ay mâmipamwang hên an-ipaihip kanla ni Apo Namalyari. Mamipahlêk hilan kapapaêpapah ta labay lan mâmungaw hilay pinili ni Apo Namalyari hên mag-in kana. ²³Kabay kaillag kaw! In-ubuh kinan hinabi ya malyari, ta êmén a kaw mâmungaw.”

**Ya pamanlumatêng oman ni Apo Jesus ya Taga-Langit,
ya In-anak Tawo**
(Mateo 24:29-31; Lucas 21:25-28)

²⁴ Wana êt ni Apo Jesus, “Pangayarin habaytoy haday kairapan, ay dumiglêm ya allo, haka ahina humawang ya buwan, ²⁵ mangatata ya bêtewên, haka maubuh hên mangayégyêg ya angkahêlêk ha langit. ²⁶ Kanan habayto, ay mahêlêk la ko ha lêmm, ya Taga-Langit, ya In-anak Tawo, ya anlumatêng hên kalamoy kapangyarihan ko, ya ayn kapantag, haka ya kapahilêw ya kahampatan hên panga-Diyos ko. ²⁷ Kanan habayto, ay iutoh ko hilay anghel ha kaganawan bansa ha boon luta, ta êmên la tsiponêni ya pinili ni Apo Namalyari hên mag-in kana.”

Ya toro ya makwa ha poon kayon igos
(Mateo 24:32-35; Lucas 21:29-33)

²⁸ Bayo wani Apo Jesus, “Mangwa kaw hên aral di ha poon kayon igos. No mamayo yan bulong, ay muwang yoy na bayto ya marani yanay kaingitan. ²⁹ Èmbayro êt, no mahêlêk yoy nan maubuh hên malyari ya habayto ya kapapalimo, ay mamwangan yoy taganán marani ya pamag-orong ko. ³⁰ Pakagilamên yo. Maubuh hên matupad ya habayto kaban main pon di ha luta hên kapareho yon Israelita. ³¹ Ya luta haka ya angkahêlêk ha langit ay main anggaan, noa, ya habi ko ay ayn anggaan.”

Ayn ampakamwang no makanoy pag-orong ni Apo Jesus
(Mateo 24:36-44)

³² Wanay na êt ni Apo Jesus, “Ayn ampakamwang no hinon allo, o oras ya pag-orong ko. Hila man ya anghel ha langit, o hiko man ya Anak ni Apo Namalyari, ay a ampakamwang hên habayto. Hiyan bat hi Apo Namalyari ya Tatang tamo, ya nag muwang. ³³ Kabay pakaalisto kaw! Dapat panay kaw nakal-an, ta a yon muwang no makanon malyari ya habayto.”

³⁴ Impamwang ni Apo Jesus kanla, no ay-êmên ya dapat mag-in pamimiyay la, kaban an-êngganan lay pag-orong na, ta wana, “Habaytoy nanad ha mihay lalaki, ya nilumagay ha marayo. Bayo ya nammita ay binaêg nay ipoh na, ta dinyanan hilan tsi-tsihan obra la, haka hinabi na ha magbantay hên ilwangan, ya dapat yan panay nakal-an ha pag-orong na. ³⁵ Kabay pakaalisto kaw! Dapat panay kaw nakal-an, ta a yo muwang no makano ya pag-orong nan main bali. A yo man muwang no kapiyabi, bonak yabi, magdadali allo, o maranon ya pag-orong na. ³⁶ Ta kayno malatngan na kaw ya angkabêlêw ha bigla nan pamanlumatêng. ³⁷ Ya anhabiên ko kamoyu, ay anhabiên ko ha balang miha, ya dapat panay kaw nakal-an! Pakaalisto kaw!”

Ya pamamulong kan Apo Jesus

(Mateo 26:1-5; Lucas 22:1-2; Juan 11:45-53)

14

¹ Amêhén, lowa tanay allo bayo mag Pistan Pangaligtas ha Egipto^x haka Pistan Puto ya ayn Pampaalsa. Hilay mánoron Kautuhan ni apo Moises, haka hilay ampamaala kanlan pari, ay ampamulong kan Apo Jesus, no ay-émén la yan madakép haka maipapatsi hén ayn makamwang. ²Ta wanla, “Paan tamo yan ipapatsi kaban pista pon, ta kayno manulhul hilay kal-atan, ya ampanggilam toro na.”

Hén tinugtugan hén pabango hi Apo Jesus

(Mateo 26:6-13; Juan 12:1-8)

³ Hén atsi hilan Apo Jesus ha baryon Betania, hén ampangan ha bali ni Simon, ya inalihan ketong, ay main nilumaténg ya mihay babayi, ya ampantan hén makamal ya pabango, ya nardo, ya atsi ha pamyanan ya dyag ha alabastro, ta intugtug na ha ulo ni Apo Jesus. ⁴Hén nahélék lan kaatag ya dinyag nan babayi, ay nanuluk hila, ya wanla, “Pata hinayang nay pabango? ⁵Pata a ya inhaliw ya habaytoy pabango, ya ampag-alaga^y hén suweldo hén mihay katawo ha mihay taon, ta indin dayi ha mangairap ya habaytoy pera?” Bayo hinuluk la ya. ⁶Noa, wani Apo Jesus kanla, “Pata an-abalaén yo ya! Paulayan yo ya, ta ya dinyag na, ay taganán mangéd. ⁷Hilay mairap ay panay yon kalamo, kabay ha hinon oras, ay mahawpan yo hila, noa, hiko ay a yon panay hén mapagkalamo. ⁸Dinyag nay agyu nan dayén. Ha pamitugtug nan pabango kangko, ay nanad nay nan in-il-an ya lawini ko ha pamilbéng kangko no matsu kina. ⁹Pakagilamén yo, ay-iri man ya legal bayri ha boon luta hén ipamwang ya Mangéd ya Habi, ay ungkatén etaman ya dinyag na, ta êmén ya a maliwaan.”

In-upit ni Judas Iscariote hi Apo Jesus

(Mateo 26:14-16; Lucas 22:3-6)

¹⁰ Bayo nammita yay na hi Judas Iscariote, ya miha kanlan labinloway tagahonol ni Apo Jesus, ta êmén na ya mai-upit kanlan poon pari. ¹¹Hinumigla hila etaman ha pay-upit ni Judas kan Apo Jesus kanla, haka nangako hila ya dyanan la yan pera. Paubat hén habayto, ay ampangihip yay na hi Judas no ay-émén na yan maidin ha gamêt la.

^x 14:1 Paskwa. Hélkén ha panlèkan labay habiên hén habi di ha bokotan hén hata Bibliya.

^y 14:5 300 denaryo ha habin Griego.

Hi Apo Jesus ay namipal-an hēn pangkaēn la ha Pistan

Pangaligtas ha Egipto

(Mateo 26:17-25; Lucas 22:7-13, 21-23; Juan 13:21-30)

12 Ha unan allon Pistan Puto ya ayn Pampaalsa ya allon pamatsi lan Israelita hēn anak tupa, ya kēnaēn la hēn habayton yabi ha Pistan Pangaligtas ha Egipto, ay kinotang ya hi Apo Jesus, hēn labinloway tagahonol na, ya wanla, “Atoy labay moy logal ya pangil-anan naēn hēn pangkaēn tamo amēhēn yabi ha Pistan Pangaligtas?” 13 Kabay in-utoh ni Apo Jesus ya loway tagahonol na, ya wana kanla, “Muna kaw ha balayan Jerusalem, pamanlumatēng yo, ay matupa yoy mihay lalaki ya ampantan banga ya nag lanēm. Pakihonolan yo ya ha bali ya howēnēn na, 14 ta habiēn yo ha nag bali, ya êmēn di, ‘Labay nan Mánoro ya itoro mo kannaēn, no antoy kuwarto ya panganan nan kaēn ha Pistan Pangaligtas, hēn kalamo na kay ya tagahonol na.’ 15 Kabay ipahlēk na kamoyu ya mihay mahlay ya kuwarto ya nakal-an ha tag-ay. Bayro yon il-an ya kaēn tamo ha Pista.” 16 Nammita hilay nay loway tagahonol, haka natupad ya balang hinabi ni Apo Jesus kanla. Kabay in-il-an lay nay kaēn ha Pista.

17 Hēn yabi yana, ay nag-tsipon hilay labinlowa hēn kalamo la hi Apo Jesus, bayro ha mahlay ya kuwarto. 18 Hēn ampangan hilay na, ay wana kanla ni Apo Jesus, “Pakagilamēn yo, miha bayri ha kaaēm tamo, ay mangi-upit kangko.” 19 Namalagêhbēg ya nakēm lan tagahonol na, haka wanlan balang miha kana, “Yarin hiko ya inungkat mo!” 20 Kabay hinabi ni Apo Jesus, “Hiyay miha kamoyun labinlowa. Ya kalamo kon ampamitsil-tsil hēn puto ha kolo, ay hiya ya mangi-upit kangko. 21 Hiko ya Taga-Langit, ya In-anak Tawo ay taganān matsu hēn nanad ha impahulat ni Apo Namalyari ha Kahulatan hēn haton lagi. Noa, taganān kaingalo ya mangi-upit kangko. Mangēd kana, ay a yay na dayin in-anak.”

Nangan hi Apo Jesus haka hilay labinloway tagahonol na hēn

pangkaēn ha Pistan Pangaligtas

(Mateo 26:26-30; Lucas 22:14-20; 1 Corinto 11:23-25)

22 Kaban ampangan hila, ay nandampot hi Apo Jesus hēn puto ta impahalamat nay habayto kan Apo Namalyari, haka na pino-potoh, bayo inggawang na kanlan tagahonol na, ta wana, “Habaytsi ya lawini ko, kowēn yo ta kaēn yo.” 23 Amēhēn, nandampot yan pamminēman ya nag alak, ta impahalamat nay habayto kan Apo Namalyari. Bayo inggawang na kanla ta naubuh hilan ninēm. 24 Haka wana, “Habain ay daya ko, ya mamoganggang ha pamatawad hēn kasalanan hēn kal-atan. Yabay ya nanad pinakapirma hēn kahundoan ni Apo Namalyari kanlan pinili na hēn mag-in kana. 25 Ta anhabiēn ko kamoyu, ya a ko pon minēm oman hēn alak, angga ha allo hēn inumēn koy bayoy alak ha pamanlokop ni

Apo Namalyari.”²⁶ Hêñ nahabi ni Apo Jesus ya habayto, ay nagkanta hilan pamagpuri kan Apo Namalyari, bayo nilumakat hila ha Tawgtug Olibo.

Impamwang ni Apo Jesus ya habiēn ni Simon Pedro ya a na ya muwang
(Mateo 26:31-35; Lucas 22:31-34; Juan 13:36-38)

27 Hêñ anlumakat hilay na, ay wani Apo Jesus kanlan tagahonol na, “Laamêhêñ ay lakwanan yo ko, ta impahulat ni Apo Namalyari ha Kahulatan, ya êmêñ di, ‘Patsêñ ko ya pastol, haka mapitatayak hilay nay tupa.’^z 28 Noa, ha pangoman kon mabiyay, ay muna ko kamoyu ha probinsyan Galilea.” 29 Bayo wani Pedro, “Lakwanan ka man hêñ kalamo ko, ay a kata lakwanan.” 30 Hinabi ni Apo Jesus, “Pakagilamêñ mo, bayo mangkatsi ya manok hêñ katalwa, amêhêñ yabi, ay katatlo mon habiēn ya a mo ko muwang.” 31 Noa, impalêkpêk ni Pedro, ya wana, “Matsi ko man hêñ kalamo mo, ay a ko habiēn ya a kata muwang.” Embayro êt ya hinabi lan kaatag ya tagahonol na.

**Nanalangin hi Apo Jesus ha katanamanan Getsemani
 ha Tawgtug Olibo**
(Mateo 26:36-46; Lucas 22:39-46)

32 Hêñ nilumatêng hilay na ha katanamanan Getsemani, ay wani Apo Jesus kanlan tagahonol na, “Mikno kaw di kaban manalangin ako.”

33 Bayo pinakilamo ni Apo Jesus hi Pedro, haka hilay loway anak ni Zebedeo, ya hi Santiago haka hi Juan. Bayron nakadanas yan hadyay kalungkutan haka kabyatan. 34 Haka wani Apo Jesus kanla, “A kina agyu ya hadyay kalungkutan ha nakêñ ko, ya nanad kinan ikamatsi. Di kaw pon haka paan kaw mabêlêw.” 35 Napaidayo ya kanla hêñ marayo-dayo ta nandoko yan nanalangin, ya no malyari dayi, ay a na ya paulayan ni Apo Namalyari hêñ magdanas hêñ hadyay pamagdusa, ya wana, 36 “Tatang ko ha langit, madyag mo ya hinoman. A mo ko dayin paulayan hêñ magdanas hêñ hatsi ya hadyay pamagdusa ya lumatêng kangko. Embayro man, ay alwan kalabayan ko ya mahonol, noa, ya kalabayan mo ya mahonol.”

37 Hêñ nirêng ya, hêñ ubat nanalangin, ay nag-orong yay na ha andyanan lan Pedro. Nalatngan na hila hêñ angkabêlêw. Pinukaw na hi Simon Pedro, ya wana, “Simon, pata angkabêlêw ka? A ka man makapagpuyat hêñ agyan miha man ya oras?” 38 Paan yon pakilakwan ya bêlêw. Manalangin kaw, ta êmêñ kaw a mahambut hêñ tukso no ansubukêñ ya paniwala yo kangko. Nakal-an ya nakêñ yo hêñ humonol, noa, a yo agyu.”

^z 14:27 Zacarias 13:7

³⁹Nag-orong yan oman hi Apo Jesus ha pinanalanginan na, hên inhalangin oman, ya inhalangin nay na. ⁴⁰Hêñ inorong na hilan oman ya tatlo, ay angkabélew hilay na êt, gawan a la mateéh hêñ magpuyat. Hêñ nimata hila, ay ayn hilan maihabi kan Apo Jesus gawan dêng-êy la.

⁴¹Hêñ katatlo na hilan inorong, ay wana kanla, “Angkabélew kaw pon êt hêñ ampagpainawa! Hukad ya! Ta nilumatêng ya oras ya hiko ya Taga-Langit, ya In-anak Tawo, ay i-upit kanlan makasalan! ⁴²Mita kitamina, ta anlumatêng ya mangi-upit kangko. Tupaén tamo ya!”

Ya pamandakêp kan Apo Jesus

(Mateo 26:47-56; Lucas 22:47-53; Juan 18:3-12)

⁴³Kaban ampaghabi ya pon hi Apo Jesus, ay main nilumatêng, ya kal-atan ya ampangamat kan Judas Iscariote ya miha kanlan labinloway tagahonol na. Hilay kal-atan ya nipag-almas hêñ êetak haka pamatok, ay in-utoh lan mónoron Kautuhan ni apo Moises, haka kanlan toa ya nag tungkulon ha bansa, haka kanlan ampamaala kanlan pari. ⁴⁴Hi Judas ay nam-i kanla hêñ palatandaan, ya no hinoy aroén na, ay yabay ya dakpêñ lan gêtan hêñ pakabantayan.

⁴⁵Tampol nilako ni Judas, hi Apo Jesus hêñ kinumusta hêñ main lamoy pamangaro. ⁴⁶Dinawhong la ya hi Apo Jesus hêñ dinakêp. ⁴⁷Noa, bat nanigpah ya miha kanlan tagahonol ni Apo Jesus, hêñ têkk hêñ mihay ipoh hêñ pinakapoon pari. ⁴⁸Amêhêñ, wani Apo Jesus kanlan amipandakêp kana, “Andakpêñ yo ko hêñ main kalamoy êetak haka pammatoñ hêñ nanad pandakêp ha mapanyag karawakan. ⁴⁹Allo-allo atsi ko bahêñ kamoyu hêñ nanoro ha Templo, unin a yo ko dinakêp. Noa, dapat matupad ya Kahulatan ya impahulat ni Apo Namalyari.” ⁵⁰Bayo naubuh la yan nilakwanan hêñ tagahonol na hêñ nipamwayu.

⁵¹Amêhêñ, main mihay miyawhay ya nangamat kanlan Apo Jesus, ya nakatapih hêñ ayn panlalê. Dinakêp la yan nandakêp kan Apo Jesus, ⁵²noa, ha pamag-ulabtoh na, ay nabalagan na ya pinagtapih na, kabay nakalaboh ya tanan nuwayu.

Hi Apo Jesus ay in-arap ha Sanedrin

(Mateo 26:57-68; Lucas 22:54-55, 63-71; Juan 18:13-14, 19-24)

⁵³Gintan la hi Apo Jesus ha balin pinakapoon pari. Ta bayro hilan ni-tsitipon hilay mónoron Kautuhan ni apo Moises, hilay toa ya nag tungkulon ha bansa, haka hilay ampamaala kanlan pari. ⁵⁴Hi Pedro ay nangamat kanla ha marayo-dayo angga ha lote hêñ bali nan pinakapoon pari. Bayro yan nakiikno kanlan bantay ya ampanêngêy. ⁵⁵Hilay ampamaala kanlan pari haka ya boon Sanedrin, ay ampanapol hêñ maibara la kan Apo Jesus, ta êmén la ya maipapatsi. Noa, ayn hilan matapol. ⁵⁶Mal-at ya bat hêñ ampanistigos ya alwan pêtêg hêñ tungkol kan Apo Jesus, noa, alwan akma ya panhabîen la.

⁵⁷Bayo main ungnoy nirêng ya naghabin alwan pêtêg, ya wanla,
⁵⁸“Nagilam naên ya hinabi na ya hiraên nay Templo ya dinyag tawo, ta ha tatloy allo, ay maypairêng yan kaatag ya Templo ya alwan dyag tawo.”
⁵⁹Noa, alwa êt akma ya hinabi la.

⁶⁰Amêhén, nirêng ya pinakapoon pari la ha arapan lan kal-atan, ta kinotang na hi Apo Jesus, ya wana, “Hino ya mahabi mo ha an-ibara la kamo? Pata a ka maghabi?” ⁶¹Noa, minghan man, ay a ya naghabi hi Apo Jesus. Wanay na êt hén pinakapoon pari kana, “Habiên mo kannaên no hika ya Mesias, ya Cristo, ya impangakon Mámiligtas, ya Anak ni Apo Namalyari.” ⁶²Wana etaman ni Apo Jesus, “Awo, pêtêg ya hinabi mo. Haka lano, ay mahêlêk yo ko, ya Taga-Langit, ya In-anak Tawo, hén nakaikno ha dapit panabtab ni Apo Namalyari ya Makapangyarihan. Haka ha pag-orong kon ubat ha langit, ay mahêlêk yo ko ha lêmm ya anlumatêng.” ⁶³Gawan huluk nan pinakapoon pari, ay ginihi nay sarili nan takop, ta wana, “A tamina kailangan hén kaatag ya tistigos, ta nagilam tamina man ya hinabi na. ⁶⁴Nagilam yoy nay pamipantag nan sarili na kan Apo Namalyari! Yarin a nan ammusmusên hi Apo Namalyari ya tawo yan bêngat! Hino ya labay yon dayêñ kana?” Naubuh hilan naghabi ya dapat yan patsêñ.

⁶⁵Hi Apo Jesus ay dinul-an haka pinagtutumbuk. Tinagpênan lay mata na, bayo wanla, “Habiên mo no hinoy nanumbuk kamo!” Pinagtatampaling la ya êt hén ampipagbantay kana.

Katatlo nan hinabi ni Pedro ya a na balay hi Apo Jesus
(Mateo 26:69-75; Lucas 22:56-62; Juan 18:15-18, 25-27)

⁶⁶Kaban atsi ya hi Pedro hén nakiikno hén kalamo lan bantay ya ampanêngêy, ay napansin yan babayi ya mihay ipoh hén pinakapoon pari.
⁶⁷Pinuliah na ya, ta wana, “Hika ay kalamo êt ni Jesus ya taga-Nazaret.” ⁶⁸Noa, hinabi ni Pedro, ya wana, “Alwa. A ko muwang ya anhabiên mo.” Bayo nagdayo yan pêrad ha apoy hén dinumani ha pag-awahan. Kanan habayto ay nangkatsi ya mihay manok. ⁶⁹A nabuyot ay napansin yay na êt hi Pedro, hén habaytoy ipoh ya babayi, ya wana kanlan lalaki ya atsi bayro, “Habain ya lalaki, ay miha ya êt kanla!” ⁷⁰Noa, nagpuglaoh yay na êt hi Pedro. Hén a nabuyot, ay wanlan karani ni Pedro kana, “Siguradon hika ya kalamo ni Jesus, gawan taga-Galilea ka êt.” ⁷¹Noa, hinabi ni Pedro, ya wana, “Alwa! Matsi ko man, ay taganán a ko ya muwang ya habain!” ⁷²Kaban ampaghabi ya pon, ay nangkatsi yay na êt ya manok. Bayo naihipan ni Pedro ya hinabi kana ni Apo Jesus, ya wana, “Bayo mangkatsi ya manok hén katalwa, ay katatlo mon habiên, ya a mo ko muwang.” Kabay inumawah ya hi Pedro hén haday tangih na.

Hi Apo Jesus ay in-arap kan Gobernador Pilato
(Mateo 27:1-2, 11-14; Lucas 23:1-5; Juan 18:28-38)

15 ¹Dali allo, ay nagkamiha ya Sanedrin, ya angkaboo hén toa ya nag tungkulon ha bansa, hilay ampanoro hén Kautuhan ni apo

Moises, haka hilay ampamaala kanlan pari, hên gêtan la hi Apo Jesus kan Gobernador Pilato. Kabay ginapoh la yan gintan kana. ² Amêhén, kinotang ni Gobernador Pilato hi Apo Jesus, ya wana, “Awta? Hika ya ari hên Israelita?” Hinabi etaman ni Apo Jesus, “Hinabi mina, Gobernador.” ³ Mal-at ya an-ibara la kan Apo Jesus hên hilay ampamaala kanlan pari. Noa, a ya naghabi hi Apo Jesus. ⁴ Wanay na êt ni Gobernador Pilato kan Apo Jesus, “Awta a mon pakibatan ya an-ibara la kamo? A mo angkagilaman ya kal-atan an-ibara la kamo?” ⁵ Noa, a ya naghabi hi Apo Jesus. Kabay nag-êpapah hi Gobernador Pilato.

Hi Apo Jesus ay hinatolan hên matsu ha koros
(Mateo 27:15-26; Lucas 23:13-25; Juan 18:39-19:16)

⁶ Main kaugalian, ha balang Pistan Pangaligtas ha Egipto,^a ya an-ibuhan nan gobernador ya mihay nakahukul ya ampilién lan kal-atan. ⁷ Kanan habayto, ay nakahukul ya mihay lalaki ya nag langan Barrabas, gawan nakilamo ya kanlan nanalanghang ha gobyernon Roma, haka gawan namatsi yan tawo. ⁸ Dinumani hilay kal-atan kan Gobernador Pilato hên nakihabi kana ya honolên nay kaugalian, ya ha Pistan Pangaligtas, ay ibuhan nay mihay nakahukul. ⁹ Kabay wana kanla, “Labay yon ibuhan ko hi Jesus, ya Ari yon Israelita?” ¹⁰ Ta muwang ni Gobernador Pilato ya hi Apo Jesus, ay gintan lan ampamaala kanlan pari kana, gawan angkahéman la ya. ¹¹ Noa, hilay ampamaala kanlan pari, ay nanulhul hên kal-atan ya pakikwaan la kan Gobernador Pilato ya ibuhan na hi Barrabas. ¹² Kabay kinotang na hila ni Gobernador Pilato, “Hino awud ya labay yon daygén ko kan Jesus ya ambaégén yon Ari yon Israelita?” ¹³ Kabay in-angaw la, “Ipako ya ha koros!” ¹⁴ Bayo kinotang ni Gobernador Pilato, “Awta? Hinoy kasalanan na?” Noa, impapakaangaw lay na êt, “Ipako ya ha koros!” ¹⁵ Hinonol nay kalabayan lan kal-atan, ta imbuhan na hi Barrabas. Impadapi na hi Apo Jesus, haka indin na ya kanla, ta êmén la ya ipapako ha koros.

Hi Apo Jesus ay minusmus hên hundaloh
(Mateo 27:27-31; Juan 19:2-3)

¹⁶ Hi Apo Jesus ay gintan lan hundaloh ha lalén balin gobernador, haka inubuh lan tsinipon ya kal-atan kapareho lan hundaloh. ¹⁷ Ha pammusmus la kana, ay pinatakopan la ya hên mahampat ya takop, ya nanad ha takop lan ari. Bayo nangwa hilan nanad tanyuong, ya pinanyag la yan korona, ya impakopya la ha ulo na. ¹⁸ Haka in-angaw ya êmén di, “Kumara dayi ya biyay hên Ari lan Israelita!” ¹⁹ Pinagpapatok lay ulo na hên tambo, haka la ya pinagdu-dul-an. Nandoko hila ha arapan na ha

^a **15:6** Paskwa. Hêlkên ha panlêkan labay habiên hên habi di ha bokotan hên hata Bibliya.

pamanggalang la waringan kana. ²⁰Pamakayari la yan minusmus, ay inalih lay takop ari ya impatakop la kana, ta impatakop la kanan oman ya takop na. Bayo gintan la yay na, ta ipako la ya ha koros.

Hi Apo Jesus ay impako ha koros
(Mateo 27:32-44; Lucas 23:26-43; Juan 19:17-27)

²¹Ha pammita lan hundaloh hên anggêtan hi Apo Jesus, hên ipako ha koros, ay natupa la ya tatang ni Alejandro haka ni Rufo, ya hi Simon ya taga-Cirene, ya ampamuli ha balayan. Dinakêp la ya ta impabalangaw kana ya koros ya paypakoan la kan Apo Jesus. ²²Inhundo lay pammita la, hên angga ha nilumatêng hila ha legal ya ambaêgên Golgota o Bungo. ²³Painêmên la ya dayin alak, ya dyag ha habaw ubas, ya naglamo hên tambal ilab ya nag langan mira, noa, a na ininêm. ²⁴Amêhên, impako la yay na bayro ha koros. Bayo pinagpalabonutan lay takop na, ta êmên la mamwangan no hino kanla ya makakwa. ²⁵Alas nuwebe hên habayto, hên matag-ay ya allo, hên impako la hi Apo Jesus. ²⁶Bayro ha koros, ha ugton ulo na, ay nakahulat ya imbara la kana, “Hatsi ya Ari lan Israelita.” ²⁷Main êt loway lalaki, ya parehon mapanyag karawakan ya impako ha koros. Ya miha ay atsi ha koros ha dapit panabtab ni Apo Jesus, haka ya miha ay atsi ha koros ha dapit uki ni Apo Jesus. ²⁸Ha dinyag la kan Apo Jesus, ay natupad ya impahulat ni Apo Namalyari ha Kahulatan ya wanana hulat, “Intad la yan mapanyag karawakan.”^b

²⁹Minusmus la yan anlumabah hên main lamoy pamamêyêng, ya wanla, “Hika awud ya labay maniran Templo ni Apo Namalyari, ta ipairêng mon oman ha tatloy allo! ³⁰Munaoy kan ubat ha koros hên iligtas moy sarili mo!” ³¹Êmbayro êt ya pammusmus la kana hên hilay mánoron Kautuhan ni apo Moises haka hilay ampamaala kanlan pari, ya wanla ha miha ta miha, “Inligtas nay kaatag, pata a na mailigtas ya sarili na! ³²No tumaoy yan ubat ha koros, habain ya Mesias, ya Cristo, ya Ari tamon Israelita, ay maniwala kitamo kana!” Minusmus ya êt, hên hilay mapanyag karawakan ya nakapako hên kalamo na.

Ya pangamatsi ni Apo Jesus
(Mateo 27:45-56; Lucas 23:44-49; Juan 19:28-30)

³³Hêñ ugtoy nay allo, ay dinumiglêm ya boon luta angga ha alas tres hên maapon. ³⁴Hêñ alas tres hên maapon, ay impakaangaw ni Apo Jesus, ya wana, “Eloi, Eloi, lema sabachthani?” ya labay habiên, “Diyos ko, Apo Namalyari, pata nilakwanan mo ko?” ³⁵Hêñ nagilam lan kaatag ya nakairêng bayro ya in-angaw na, ay êndat lan ambaêgên na hi Propeta Elias, kabay wanla, “Gilamên yo! Ambaêgên na hi Elias!” ³⁶Nuwayu ya

^b 15:28 Isaias 53:12

miha kanla hên namiptêh hên nanad bolak ha mihay hanga, ta indêrê na ha nangihoy alak, ya dyag ha habaw ubas, ta painêmên na ya hi Apo Jesus. Bayo wana, “Paulayan tamo ya raw. Hêlkên tamo no iligtas ya ni Elias!” ³⁷Amêhêñ, nan-angaw hi Apo Jesus hên hadyay hêkaw, bayo natsi yay na.

³⁸ Ya makugpa ya takop ya pinagpênlan bayro ha lalê hên Templo ha Jerusalem, ay biglan nawakwak hên napibonak paubat ha babo angga ha aypa. ³⁹Hêñ nahêlêk nay pangamatsi ni Apo Jesus hên ampamaala kanlan hundaloh, ya atsi ha êtêb na, ay pinuri na hi Apo Namalyari, ya wana, “Pêtêg bay awud! Hiyay Anak ni Apo Namalyari!” ⁴⁰Main babayi bayro ya ampandungaw ha angkalyari. Kalamo la hi Maria Magdalena, hi Salome haka, hi Maria ya indo ni Jose boy hi Santiago ya ambaêgên Ali. ⁴¹Hilay habaytoy babayi ay kalamo lan Apo Jesus hên nanaglap kanla paubat hên atsi hila pon ha probinsyan Galilea. Main pon êt hên kal-atan babayi bayro, ya kala-kalamo la hên angga ha Jerusalem.

Ya pamilbêng kan Apo Jesus

(Mateo 27:57-61; Lucas 23:50-56; Juan 19:38-42)

⁴²Hêñ ampinaboy nay allo, haka gawan ha kaugalian la, ya dapat milbêng ya natsi, hên bayo matata ya allo ha Biyernes, ya allon pamaglêan la para ha allon pamagsimba la, ⁴³ay makhaw ya nakêm hên nakiarap kan Gobernador Pilato, ya miha kanlan taga-balayan Arimatea, ya nag langan Jose. Hi Jose, ay miha kanlan kalamo ha Sanedrin, ya anggalangêñ hên kapareho na, ya ampangênggan ha pamanlumatêng hên pamanlokop ni Apo Namalyari. Pinakihabi nay bangkay ni Apo Jesus, ta iilbêng na dayi. ⁴⁴Nag-êpapah hi Gobernador Pilato hên nagilam na ya natsi yay na hi Apo Jesus. Kabay impabaêg nay ampamaala kanlan hundaloh, ta labay nan mamwangan no pêtêg yay nan natsi hi Apo Jesus. ⁴⁵Hêñ namwangan na ha ampamaala kanlan hundaloh ya pêtêg yay nan natsi hi Apo Jesus, ay nabay yay na etaman. Kabay impaulay nay na kan Jose ya bangkay ni Apo Jesus. ⁴⁶Nanaliw hi Jose hên makarang ya takop ya naputsi ya pinangêlêl na hên bangkay ni Apo Jesus hên naiaypa nay na. Bayo inhowêñ na ya ha bayoy dinyag ya pay-ilbêngan ya lêyang. Pangayari, ay intulid nay hadyay hêlay bato hên panakap na ha bêbêy pinay-ilbêngan. ⁴⁷Hi Maria Magdalena haka hi Maria, ya indo ni Jose ay nakahêlêk hên pamilbêng la kan Apo Jesus.

Hi Apo Jesus ay nabiyyay oman

(Mateo 28:1-8; Lucas 24:1-12; Juan 20:1-10)

16 ¹Hêñ yabin Sabado, hên nayari ya allon pamagsimba la, ay nanaliw hên pabango, hi Salome, hi Maria Magdalena, haka Maria ya indo ni Jose haka hi Santiago, ta habaytoy pabango, ay itugtug

la dayi ha bangkay ni Apo Jesus ha humonoy maranon. ²Dali allo êt hén allon Dominggo, ay nagtagloh hilay nay babayi ha pinay-ilbêngan, kabay hén nilumatêng hila, ay an-umawah ya allo. ³Kaban atsi hila ha dann, ay nihahabi hila no hino ya mapakihabian la hén itulid ya bato ha bêbêy hén pinay-ilbêngan kana ta êmén hila makahowén. ⁴Noa, hén hinlêk la, ay napansin la ya naitulid ya habaytoy hadyay hêlay bato. ⁵Hén hinumwén hila ha pinay-ilbêngan, ay nahêlêk lay mihay miyawhay ya nakatakop hén naputsi ya nakaikno ha dapit panabtab, kabay hadyay limo lan babayi. ⁶Noa, wana kanla, “Paan kaw malimo! Antapolên yo hi Apo Jesus, ya taga-Nazaret ya impako ha koros. Nabiyyay yan oman! Ayn ya di. Hêlkén oy habaytsi ya pinaybul-ihan kana. ⁷Mag-orong kaw, ta habiën yo kan Pedro haka kanlan kaatag ya tagahonol na, ya hi Apo Jesus ay nangoman nabiyyay, haka muna yay na kanla ha probinsyan Galilea hén nanad ha hinabi na kanla.” ⁸Inumawah hila ha pinay-ilbêngan hén ampamêgpêg, haka pinarah lan nuwayun nagtagloh kanlan tagahonol. Gawan ha limo la, ay a la inhabi ya nalyari ha hinoman ya atsi ha dann.

Nagpahlêk hi Apo Jesus kan Maria Magdalena
(Mateo 28:9-10; Juan 20:11-18)

⁹[Hén habayto êt hén allon Dominggo, hén nabiyyay yan oman hi Apo Jesus, ya una nan pinapgahlékan, ay hi Maria Magdalena, ya inalihan na hén hato hén pitoy narawak ya a angkahêlêk ya hinumapat kana. ¹⁰⁻¹¹Nagtagloh hi Maria Magdalena kanlan tagahonol ni Apo Jesus ya nalatêng nan ampamalagêhbêg ya nakêm haka ampipanangih, ta hinabi na kanla ya nabiyyay yan oman hi Apo Jesus haka nahêlêk na ya. Noa, a hila naniwala ha hinabi na.

Nagpahlêk hi Apo Jesus kanlan loway tagahonol na
(Lucas 24:13-35)

¹²Panga-ubat hén habayto, ay nagpahlêk hi Apo Jesus kanlan loway tagahonol na, ya atsi ha dann hén palako ha mihay baryo, noa, kaatag ya itsura na. ¹³Tampol hilan nag-orong ha Jerusalem ta imbalita la kanlan kapareho lan tagahonol, ya nahêlêk la hi Apo Jesus, noa, a hila pinaniwal-an.

Nagpahlêk hi Apo Jesus kanlan labinmihay tagahonol na
(Mateo 28:16-20; Lucas 24:36-49; Juan 20:19-23; Dyag 1:6-8)

¹⁴Bayo nagpahlêk ya hi Apo Jesus kanlan labinmihay tagahonol na, kaban ampangan hila. Hinabyanan na hila, gawan kulang ya paniwala la kana, haka kakdêyan ulo la, ya a hila naniwala ha balita lan nakahêlêk kana ya hiyay nabiyyay oman. ¹⁵Wana kanla, “Ipamwang yo ha boon

luta ya Mangêd ya Habi tungkol kangko. ¹⁶Hilay maniwala ha Mangêd ya Habi, haka pabawtismo, ay miligtas ha kaparusaan hên kasalanan la. Noa, hilay a maniwala ay parusaan ni Apo Namalyari. ¹⁷Hilay ampaniwala kangko, ay madyanan ni Apo Namalyari hên kapangyarihan hên manyag kapapaêpapah, hên nanad ha mamaalíh hên nangarawak ya a angkahêlêk, gawan ampanggamit hilan langan ko, haka maghabi hila ha bayoy habi ya a la pinag-aralan. ¹⁸Makatalan hila man hên utan ya makamatsi, o makainêm man hên hinon makamatsi, ay ayn malyari kanla. No ipalunto lay gamêt la, hên ihalangin hilay nipaghakit, ay maalíh ya hakit la.”

Hi Apo Jesus ay nag-orong ha langit
(Lucas 24:50-53; Dyag 1:9-11)

¹⁹Hêñ nahabi nay na ya habayto ni Panginoon Jesus, kaban anhêlkêñ la ya, ay antumag-ay yay na hêñ palako ha langit, haka ya nikno ha dapit panabtab ni Apo Namalyari. ²⁰Hilay tagahonol na ay nipammitay na ha ayri man ya legal, hêñ naypamwang hêñ Mangêd ya Habi tungkol kana. Hi Panginoon Jesus ay ampamaptêg ha pamanoro la, gawan habaytoy kapapaêpapah ya angkadyag la ha kapangyarihan na.]